


江亢虎
南遊迴想記



上海中華書局印行

MA
K933.09
10



3 2173 3789 2

江亢虎南游迴想記自序

南游迴想記者。民國癸亥甲子之際。南洋各屬游觀百日間之影事。迴想而補記之者也。余兩度歐行。均經過南洋。然未遑徧游。又未得久住。此次專爲視察各屬。除荷屬外。歷英法美暹領域。星加坡。檳榔嶼。巴生。柔佛。仰光。盤谷。西貢。馬尼拉。諸埠。多者十餘日。少者亦三四日。參觀各機關團體事業。調查華僑與土著生活狀況。所至席不暇暖。與日俱出。至夜半而不休。無暇作筆記。馬尼拉歸舟六日間。乃儘所憶及。拉雜錄出之事。過境還。迴想不盡可得。亦不盡可記。卽今已記者。亦不必有可記之價值在也。所以特介紹與讀者。乃欲使知行間。字裏實含有不少亡國滅種之血淚。二三十年前。愛國志士所號呼警告不辭之預言。乃一實現而躬逢之。昔日戲言身後事。今朝都到眼前來。華僑現在之地位不可長保。未來之境遇更有難言。同胞聽之。國亡種滅。海外並無避秦之桃源。富豪無所用其金錢。學者無所用其智慧。軍閥無所用其威武。救人須趁未死時。一旦氣絕。神醫束手。仙丹不靈。顧當此綿擾一息陰陽之交。而寒涼雜投。攻補並進。治頭治脚。紛紛呶呶。甚者禱其肢體。剗其肝肺。以爲嘗試。又豈有幸哉。愛護病人者。不但須延醫進藥。并當力排浮議。堅守定方。不爲一時徵候所惑。明乎此者。始可與言余之主張。此記特零星雜感。鱗爪而已。歷次演說筆記稿。及所

2

江亢虎南游迴想記 自序

一

江亢虎南游迴想記 自序

得統計報告材料均別載。

民國新甲子二月廿四日回滬自識



919.1
3102

04540

江亢虎南游迴想記目錄

自序

插畫

- 一 著者在南洋之寫真
- 二 著者及其從游者林耕餘君
- 三 星嘉坡華僑教育界歡迎會
- 四 星嘉坡南洋女學歡迎茶會
- 五 吉隆坡坤成女學歡迎會
- 六 吉隆坡各社團代表留別會
- 七 仰光華僑各界歡迎宴會
- 八 盤谷學界報界歡迎會
- 九 吉隆坡培德女學校長李少玲君
- 十 檳榔嶼福建女學教員周錦英君
- 十一 英屬馬來聯邦之一王

江亢虎南游迴想記 目錄

十二 暹羅今王及其一愛妃

十三 馬來女子之便妝

十四 緬甸女子之嚴妝

十五 馬尼拉嘉年華會之花后及其侍從官長

十六 斐律濱南部山中有尾民族

十七 檳榔嶼之極樂寺

十八 仰光大光塔正門

十九 盤谷最壯麗佛寺之一

二十 盤谷湄河龍船及沿岸之佛寺

廿一 印度教堂正門

廿二 回教堂之圓頂

廿三 西貢之玉皇殿

第一編 星加坡

護照手續 領館簽字

兌換貨幣

整備行裝

舟中雜憶

香港紀遊

星島登陸

華民間話

領事盛款

華僑生活

華僑教育 政府學校 青年團體 閱書報社 華僑報紙
培英演劇 參觀工廠 大資本家 邱菽園君 演說大會
女校茶話 游觀名勝 各教廟堂 土人生活 南大募捐
車站送別

第一編 柔佛

海峽長堤 柔佛王國 馬來王宮 回教大堂 寬柔學校

黃梨工廠

第二編 吉隆坡

吉隆到著 葉阿來事 華民談話 游觀街市 參觀名勝
參觀學校 平民學校 演說大會 二十二行 坤成茶話
益羣報館 華視學官 壽星山洞 參觀錫鑛 車站送行

第四編 巴生

巴生途中 樹膠公所 學校演說 港口風景

第五編 檳榔嶼

檳城大略 參觀學校 學界家庭 華民談話 全島周游

江亢虎南游迴想記 目錄

升旗山頂 佛教寺觀 法空禪師 公園名勝 檳城報館

新式團體 戲園演說 臺報弁言 易翁碑記 小游仙詞

兩次送行

第六編 仰光

華商船中 林振宗事 華僑中學 天時地氣 佛教大盛

寺觀莊嚴 佛臥臥佛 亡國現狀 華僑招待 新年風味

印度苦力 參觀僑學 報館團體 歡迎大會 工黨演說

游覽名勝 緬印戲劇 緬人生活 虎豹藥房 輪步送行

第七編 盤谷

車中遇友 湄河風景 立國現狀 華人血胤 王室趣聞

暹人特色 佛寺大觀 君民同樂 飛機工廠 盤谷街市

國立大學 親王宴會 華僑教育 教育苛例 華僑事業

聯合歡迎 暹羅舊劇 多蟲之國 登舟送別

第八編 西貢

法領分界 西貢大略 上岸情形 移民局規 華僑苛遇

越人苦況
華工近狀
參觀學校
商會演說
工會歡迎

國民黨會
游觀小記
新海陽船

第九編 馬尼拉

上岸情形
工黨招待
教育會長
學務怪象
參觀僑學

公開演說
華僑事業
總領事館
華字報館
斐島政聞

社會進步
公共機關
各種公學
教會學校
女學開會

鄉村游觀
華人血裔
嘉年華會
鬪鷄之戲
趁輪內渡

第十編 總評

滿地荆棘
入境苛例
僑民困苦
和屬無理
僑民界限

民黨勢力
僑民惡習
教育缺點
南洋奇字
統治不同

交通發達
氣候土風

著 者 在 南 洋 之 寫 真




著者及其從游者林耕餘君






星嘉坡華僑教育界歡迎會




星嘉坡南洋女學歡迎茶會


吉隆坡坤成女學歡迎會




吉隆坡各社團代表留別會



仰光華僑各界歡迎宴會



盤谷學界報界歡迎會



吉隆坡培德女學校校長李少玲君



檳榔嶼福建女學教員周錦英君



暹羅國王及其一愛妃



英屬馬來聯邦之一王





緬甸女子之嚴妝



馬來女子之便妝




斐律賓南部山中有尼民族



馬尼拉嘉年華會之花后及其侍從官長

檳榔嶼之極樂寺



仰光大光塔正門




Entrance Siva Dagon Pagoda. Rangoon.

盤谷最壯麗佛寺之一



盤谷湄河龍舟及沿岸之佛寺




印度教堂正門





回教堂之圓頂



西貢之玉皇殿

江亢虎南游迴想記

第一編 星加坡

護照手續

南游之計既決。自十一月一日以來。終日所奔走者。皆旅行準備之事。是可分數項言之。第一則辦護照也。歐戰前華人出洋除俄美兩國外均可不用護照。今則除日本暹羅及香港外。任何國及任何國屬地皆需護照。自上海首途者。護照即就近向江蘇交涉公署請領之。徵費每紙三元。赴美倍之。民十外交部領行護照定式。紙本布面。內列姓名。年歲。籍貫。職業。并備各國文字。通用一年。本國各省交涉公署皆遵發此種。而海外使領尙因循苟簡。未能畫一。或用劣紙木刻官銜。如前清告示封條。或專用西文。并姓名亦不寫漢字。真怪事也。護照本不難辦。而辦者往往遷延多日。尤有一事。地名區域稍不精確。恆生問題。即如此次護照。原載赴英屬星加坡。比詣英領簽字。談及欲往檳榔嶼麻六甲。謂須改用英領海峽殖民地字樣。因此展轉又費數日。其後抵星加坡。始知此名仍未賅括。必須分列海峽殖民地及馬來聯邦。然後可以周歷英領馬來半島。英文 *Strait Settlements and Federate Malay States*。或簡稱 *S. S. & F. M. S.* 此外如赴法屬者。須寫法領印度支那。不可但寫安南。更

不可但寫西貢。赴和屬者。須寫和領東印度羣島。不可但寫爪哇。或蘇門答臘。更不可但寫巴達威亞。或三寶壟也。吾人夙習囹圄吞棗。名詞界說向不講求。困難往往由此而起。不可戒愼也。

領館簽字

護照到手。又須向各國領事館請其簽字。此行擬往英、美、和、法、四屬。故須分向四國領館簽字。英、法兩國較爲簡單。惟其辦公時間甚短。而事務甚繁。往往多人雁行鵠立。魚貫進退。頗費耐心。和、美入境限制均嚴。而兩國所持之方針迥異。和領向不問訊。一律簽字收費。而有効與否。毫不負責。美領則詢家世。估產業。量身裁取證人。如慮囚然。不輕易簽字。而被拒登岸者。則絕稀。和務禁絕智識階級。而美務禁絕勞動階級。其目的正相反也。赴美屬地者。與赴美國同。依一八八四年增修禁止華工法律。惟準官、商、教、學、游、歷五種人入境。嗣附入新聞記者一條。其簽字費各國不同。現收之數。英三元九角。法八元四角。和四元八角。美十七元。赴美護照與各國不一式。中美合訂兩面文字。形式上乃中國政府備辦。由美國使領簽字。實際上則美國使領主持。交中國政府畫諾而已。向法領簽字者。尤多往來滇省之人。本國交通不便。假道滇越鐵路。不能不出此買路錢也。

兌換貨幣

各國各屬貨幣互殊。前游歐美曾購用通濟隆之旅行支票。Thomas Cook and Son Book of Travellers' Checks 此次因亦照行。以華銀兌換英金爲標準。所至均可支用。該處通行之貨幣。意甚便也。事後始悟此舉爲多事而且失策。蓋南羣島華幣流通。價格亦高。今一出入間。吃虧百分之五以上。而鑄價漲落尙無定也。茲就余所經各處貨幣。以華銀約計之。英屬馬來用達拉。Dollar 合一元。析爲百錢。Cent 緬甸與印度用盧比。Rupee 俗稱盾。合六角。析爲十六安那。anna 六十四錢。暹羅用帖克。Tacle 寫作鉢。讀若拍。合八角。析爲百錢。安南用批亞司特。Paste 合壹元。析爲百錢。斐律賓用撒瓊。Peso 亦同。

整備行裝

南洋各屬地處熱帶。絕對不需冬衣。旅行所御。無論何時均以白帆布洋服爲宜。尤以合襟扣領者爲便。惟須多備換洗耳。此外黑色羽紗上衣。淡色呢絨單衣。袴。可間用之。黃色或灰色。布合襟衣。他處惟工人着之。南洋則頗通行。禮服與歐美同式同色。第質料較薄而已。晚間有用白色布製禮服上衣者。在中國日本亦常見。此歐美人因地因時以制宜之意。帽多白色硬壳。以通草或樹膠爲胎。取其抵禦日光。或戴氈呢。質料異而效用同。草帽除斐律賓外絕稀。嫌其太易傳熱也。此外浴衣。拖鞋。及絨線毯。旅行亦不可不帶。夜中有时甚涼。而舟車旅館多有鋪而無蓋。內地人或不慣之。

舟中雜憶

此次由上海赴新加坡。所乘爲英國郵船馬勒瓦號。S. S. Malwa 屬 P. and O. Co. 公司。船泊吳淞口。十一月十三日午十二時半。小輪自海關碼頭開行。約一時許。乃達大輪。又一時許。大輪始放洋。偕行者惟林耕餘君一人。林君生閩南晉江。寄居臺灣。留學東京。畢業高師。今入南方大學文科。專攻國學。余不通閩語。而南洋華僑多閩人。不通國語。故此行頗得力於林君。船客頭二等多歐人。印人絕少。華人。余與林君外。尚有天津南京商人各一。均赴仰光。僑外十餘年。往返六七次。而不通西語。不諳西俗。恆披衣靸履。以入食堂。刃叉飛戰於盤中。肴核狼籍於几上。余時時耳提而面命之。舟行不甚速。而風日晴麗。波平如掌。三餐一宿而外。惟以遊戲運動爲事。自念奔走廿年。勞人草草。惟一休憩。乃在舟中。晚餐後。甲板上奏音樂。士女舞蹈。恆達深夜。西方美人。調朱傅粉。袒臂露胸。淡抹濃妝。爭妍鬪媚。譽者稱其愛好出於天然。審美根於科學。毀者則詆爲冶容誨淫矣。異性心理。頗難揣知。即當局者。恐亦不能自解耳。余在船。患牙痛甚劇。船醫診察一次。給以外用藥水。毫無功效。亦竟置之。比離舟之日。乃開單索費英金一鎊。各公司船醫例不徵費。今竟出此。英人竹槓手腕。可驚。

香港紀遊

十一月十六日八時抵香港。乘小輪上陸。訪凌匹參。楊兆禎諸君。道遇熊長卿君。承招午餐。

於陶陶仙館。筵間痛詆孫中山。謂廣州政府徵稅拉夫。查抄籍沒。乃至擄人勒索。日有所聞。又謂孫科聚斂附益。一年以來。滙往美洲者已千五百萬金。日內聯軍失利。悉索現款。寄頓滙上一外國銀行。爲下臺自娛計。余向尊重中山爲人。旅美時尤稔知孫科。君深冀傳聞非眞。但亦未從置辯。聞中山近已加入莫斯科第三國際。俄國特派專員來華。改組國民黨。訓練革命軍。試驗共產主義。非常之原。黎民懼焉。謗議繁興。事無足怪。余所望者。第一中國當自力奮鬪。不可間接聽人指揮。第二俄國革命已得之教訓。我當善爲法戒而已。午後參觀香港大學。爲英政府所立。中政府略有補助費。一九〇〇年開辦。現設醫科。工科。文科。有學生約二百人。用費最貴。年需千元。幸有官費生及免費學額各若干名。校舍位置建築設備均極合宜。宿舍尤佳。上等等者每人一廳一室。盥浴廁踰均得獨用。電燈電扇什物咸備。儼然西式旅館矣。余到時已下課。草草參觀一過。蒙學生幹事數人邀往自治會堂茶話。并請演說。辭以異日。匆匆返船。已萬家燈火矣。翌晨開行。直放南下。氣候漸煥。船客船員均易白衣。

星島登陸

星加坡 Singapore 梵語獅子島之義。馬來名若石叻。粵人譯其音稱之。余往來歐洲舟次。此處者多次。皆得遊覽。但未居留。故途徑終不了了。十一月廿一日早八時抵步。盧燿昌、姚

蟾伯、蔡晉卿三君來遊。下榻老百索街之興隆號。號爲此間大地主陸運懷君經租處。理事則邱雁賓君。盧姚皆精武體育會主任。自上海新來。蔡則星加坡會友也。先是余本與盧姚約伴同遊。嗣其伴友羅嘯傲君貽書。謂南洋僑胞多懷疑反對社會主義。意似恐余同遊爲累。余因謝絕盧姚而獨行。茲蒙約與同居。余意仍覺未允。嗣傳殖民政府對余特別注意。興隆號人果大恐慌。一日竟不告余而逕遷余行李。彷彿風聲鶴唳景象。眞可笑又可憐也。余卽日移寓祺生旅館中。總領事羅昌君及僑商數人皆約余往寓其家。一律婉卻之。

華民問話

英領馬來半島分海峽殖民地及馬來聯邦兩部。海峽殖民地又分星加坡、麻六甲、檳榔嶼三區域。華僑通稱三州府。其馬來聯邦凡四。則通稱四州府。此外尙有未入聯邦之小保護國數處。英政府經理華人事務之機關謂之華民政務司。英名 Chinese Protectorate。三州府合設一總司。而又各設一分司。星加坡爲入境第一口。故最稱衝繁疲難。主其事者某君。專函請余往見。并見其副手粵人何樂予君。門懸虎頭牌示儼然前清官衙。某稱正堂。通稱大人。何稱副堂。通稱老爺。何僑居已逾三十年。服役亦垂二十年。通國文國語。由通事而漸躋斯職。今擁貲數百萬矣。某爲一神經質人。言時兩顴赤色。目放兇光。輔頰戰戰自動。見面握手。卽問余此來何爲。余曰遊歷調查而已。某曰調查非得殖民政府特許不行。此間情況

甚不願使人知之。余曰：余之所欲知者，僅華僑之情況而已。某曰：非得殖民政府特許，卽華僑情況亦不使人知之。余見其不可異語，乃慷慨聲言：此行別無作用，尤非爲宣傳運動革命而來。且原擬僅留十日，此十日間，余可保證星加坡英政府之安全。某乃動容相謝，遂自易其詞，示歡迎慰勞之意。余不欲多談，輿辭遽出。嗣聞此君作威作福，慣以盛氣凌人。蔡子民、黃任之、胡子靜、諸君之來，均經多方留難。此次英政府專電屬其特別注意，故對余事尤鄭重。幸總領事羅昌君雅重交遊，力任保證。某又經余面折，其氣燄亦頓低。此後游行演說，不見更來囉唆矣。

領事盛款

駐星加坡總領事羅昌君，粵花縣人。康南海之快婿也。其夫人卽同璧女士，通中西文，能詩畫，豪氣不減乃翁。羅君早年留學英倫，革命前回國，擢上第，膺要職。日攻青島時，方任山東交涉使，持正不阿，被忌受代。出爲倫敦總領事，嗣調此職。前年余自歐歸，訪談大樂。此次尤備蒙招待，羅君嗜酒健談，有名士風。今奉部調坎拿，大意不自得，益放情狂飲，承招邀兩次，均假座匏室俱樂部。此等俱樂部專爲各幫富商之行樂機關，以吸鴉片、又雀牌、狎妓、飲酒爲常課。其庖饌極精，每筵費百金。妓稱琵琶仔，皆廣州人。清歌一曲，需費三圓。上海班則需費八圓。物以罕爲貴也。其實琵琶仔不盡粵人，上海班尤不盡滬人。冒名勝趨風氣，爲多博

纏頭賞也。主人例召妓娛賓。自數人至數十人。一夜或費千金。酣嬉淋漓。往往達旦。南洋富商之生活類如此。羅君特逢場作戲而已。一日約往其家。夫人亦出見茶話。承示所藏古書畫及南海題詠多種。并見章行嚴所贈詩。因亦率成一律。十年敷歷氣猶蠱。煮酒論交興不孤。滿目蝴蝶無國。是一身蓬梗況官乎。勞形案牘從山積。得意丹青信手摹。更喜傳經佳偶在。五湖煙水足懽娛。羅君自謂將歸隱洞庭山中。故未句及之。繼任總領事爲周國賢君。乃梁任公東床。其夫人卽藝蘅館主人。風雅倡隨。先後踵武。亦韻事也。副領事秦汝欽君。無錫人。前京師大學堂學生。長齋奉佛。持淨土宗。

華僑生活

英人尊拉佛爾 Sir Thomas Raffle 爲星加坡之開闢者。爲建銅像立石碑。其實華人移殖此地更早已百餘年。且其生齒繁殖無比。據最近統計。全島人口六十餘萬。而華人居三分之一。到星島者彷彿到香港。到津滬漢各租界。除官吏軍警外。無往非華人也。華人皆自閩粵來。閩則漳泉。二州。粵則廣惠潮瓊。四州最多。富者擁資數百或數千萬。貧者拉車打石盜竊乞丐亦隨處見之。以職業論。商爲多。農次之。工又次之。然商多店傭。農多樹膠園傭。是雖農商而實工也。生活程度與京滬相若。視港粵爲低。而工價則較高。故勞動家羣趨之。茲以內地人眼光標舉華僑生活特殊狀況如下。一語言。閩粵方言互殊。卽閩與閩粵與粵又不盡

可通。於是多以馬來語爲通用語。近來始有解國語者。然止最少一部分人而已。一服裝。男女一律短衣。赤足着木屐或拖鞋。男衣多白色。女衣多黑色。男子多洋服而華袴。衣釧綴金銀。拖鞋飾彩繡。以此爲美觀。一飲食。喜肥膩腥膻。又喜辛烈之味。到處皆飲食館。尤多露店小攤。居人恆以街沿爲饕餮堂。上等有坐處。下等惟箕踞承之一居處。房租甚昂。屋仄人稠。天氣又熱。衛生非宜。尤有多人無所託庇。隨地露宿。習以爲常。一家庭。多數多妻。兼尙多子。或蓄螟蛉。尤好置雛婢。一家男女大小平均恆十數人以上。一嗜好。嫖賭飲吹。四者皆盛。鴉片公賣。到處開燈。英政府資其利以裕歲入。華僑有請禁者。則以中國并未禁絕爲藉口。宴會喜用洋酒。此亦一大漏卮矣。一信仰。雜祀孔多。甚於內地。土地觀音。關帝。天后。最流行。朔望之日。進香求籤。春秋之節。迎神賽會。至爲熱鬧。人家皆祀祖宗神仙。雖一椽之寄。必拓尺地以安神龕。或皮之門楣。或挂之牆壁。香燭紙箔。歲費不貲。

華僑教育

華僑教育本二十年來新事業。星島原有華僑教育會。嗣因抗爭註冊事。被英政府解散。會長黃肖巖君尙在此間。頗受拘束。副會長莊啟泉君及其夫人余佩皋君則驅逐出境矣。英人特設提學使視學員等。專理華僑學校事。學校必註冊方准開學。教員必註冊方准上課。隨時稽查。按期報告。不如式者。得勒令停閉改組。此間學校分立。多取地方主義。往往卽就

併屬會館隙地構成。各地方之商人公舉董事。董事公舉總理。協理。總理。協理。聘請校長及教職員。董事爲主體。校長爲客體。如人家西席然。星島市內學校最大而參觀所及者。有廣屬之養正學校。潮屬之端蒙學校。泉屬之道南學校。愛同學校。學生各一二百人不等。校長教員有外省人。高小課程多用國語教授。養正規模較大。有中學班。師範班。別有一各屬合立之華僑中學。校長黔人魯士毅君。北大畢業。女學凡三處。一曰南洋。一曰南華。一曰中華。學生不分畛域。辦事頗見精神。南洋爲余佩學女士所創辦。今校長粵人榻偉靈君。曾留學北京女高師。南洋校長奉天人石祐磊君。曾留學燕京大學女子部。兩校尤有活潑進取氣象。此外尙有崇福女學。崇本女學。惜未及見。南洋校長之姓。南華校長之名。均奇字。所不識。榻讀如宣。碩讀如厥。兩君皆余一字師也。又有中南學校。爲閩人王水斗君所倡辦。任湘人賓君爲校長。男女同學。獨開風氣之先。平民教育則有工商補習學校。以上均曾往爲演說。

政府學校

英政府所立公學 *Raffles Institute* 分男女兩部。有學生各四百餘人。大半土生華僑也。男生平均十三歲起。由他校升學而來。在此更三年畢業。女生則自六歲起。初等高等共約十年畢業。於此可見男童入學者較女童爲倍多。且尤奇者。男校絕少歐人。而女校絕少華人。蓋華人輕女之習。至海外而猶然也。畢業得憑。卽有投考劍橋大學資格。而殖民地教育

則至此止矣。男女兩校長均自英倫來。駐星島多年。熟知華僑狀況。而均不滿意於華僑學校。彼此亦絕無聯絡接洽之事。其反對之藉口。大抵爲經費無着。教授乏才。管理太寬。功課敷衍。英文尤劣。余意前四項無標準。英文程度。僑校實低。校長多不通英文。英文教員之口音教法。又太不講究。故生於英殖民地。而英文成績恆視內地各校爲遜。中學畢業回國投考大學者。往往以英文不及格而被擯。此可異矣。顧英立公學。又矯枉過正。嚴禁學生華語。犯者斥罰或退學。稱英國爲祖國。而於中國文學。歷史。地理。絕不使聞知。教科書中及中國事每多譏彈嘲弄之詞。且學生必自蒙養入學。中途不予錄取。故與僑校始終背馳。永無會通或折中之望。吾人既不能強英校兼重漢文。故惟有就僑校兼重英文。知己知彼。理固應爾。人才前途。關係至大。英美教會爲華僑所立學校尙甚多。女學尤發達。其教授管理多與內地同。雖有漢文。亦不重視耳。

青年團體

星島俱樂部林立。但多爲資本家驕奢淫侈之機關。其有進步思想。求高尚娛樂者。當以青年勵志學社爲新式團體之先驅。社員多土生商人。通國文國語。并曾受英文科學教育者。各省各界自由加入。現任社長楊治襄君。四川人。留法學生。南洋商報主筆。會員黎寬裕。曾幾生。兩君。過從較密。招待最殷。兩君皆土生。而國學頗有門徑。國語尤極自如。內地書報瀏

覽甚廣。余到步之日。該社首先開會。歡迎演說。又有行餘勵志學社。成立較晚。性質略同。亦歡迎演說。并攝影紀念。又有南廬俱樂部。主持者爲胡載坤醫士。猝遭母喪。未遑款接。三團體乃星島智識階級之結晶也。又有土生俱樂部。會員通用英語。中華俱樂部。爲新式商人酬酢之場。會所均極堂皇。

閱書報社

同德閱書報社。成立在前清之季。舊爲革命黨機關。同盟會化身。今尙維持此精神。近年英政府取締國民黨各支部。故該黨運動復以閱書報社爲中心。社員多廣州人。社中高懸先烈及黨魁像。書報亦以民黨言論爲限。余到步時。首議歡迎。因恐干涉悞事。遲至最後舉行。蓋英政府向對該社特別注意也。又有同文閱書報社。亦屬民黨。而會員皆瓊州人。推舉代表。歡迎演說。余以時間經濟。令與同德合辦。竟不可能。同省同黨。徒以異屬。界劃井然。地方觀念可謂重矣。又有星洲閱書報社。爲教會所立。無政黨色彩。附設幼稚園。有男女學生五十餘人。

華僑報紙

星島有叻報。爲南洋華僑最早之新聞。成立三十餘年矣。營業性質。不持黨見。主筆周君南君。湘人。北大畢業。留此有年。各界均極聯絡活動。新國民報爲孫中山機關。南鐸報爲陳競

存機關兩不相容。日有辨難。南洋商報最稱後起。總理爲陳嘉庚君。因事被勒停版。現正在上訴中。各報惟港粵有專電。餘均轉載內地新聞。於閩粵事特詳。內容外觀均遜。出報少而索價昂。惟恃廣告費。頗足自支持。周君南君過談無虛日。瀕行索贈詩。口占應之。眼底蝸蟻百不堪。拔身橐筆走天南。雲橫海國鴻飛遠。日落神州龍戰酣。人似飄萍離復合。文如諫果苦回甘。願君更作雄獅吼。喚起僑魂共快談。

培英演劇

僑校經費多恃募捐。捐款來源多由演劇。蓋與內地同一可憐。距星加坡市十餘英里有義順莊。蓋閩人林義順君之樹膠園也。佃戶泉州黃姓。創立義學。曰培英。十一月廿五日夜演劇募捐。特約往觀。沿途皆橡樹林。莊中人口數千。校中生徒亦百餘人。所演有新劇。有舊劇。有京調。有幻術。券價之外。兼售零件。無定價。隨意捐。故汽水一尊。紙煙一盒。或十元。或五元。尤有鮮花籃。買者或數百元。轉售他人。亦數百元。如此遞嬗。可售得數千元。余愧未解囊。惟就劇場爲之演說。語云。富者贈人以軒。仁者贈人以言。請假此爲解嘲矣。

參觀工廠

星島工廠多製樹膠。余參觀張永福、陳嘉庚、林義順三家樹膠工廠。可以概見其餘矣。張君粵人。民黨健將。商界資格亦最老。廠名平民。兼製生貨熟貨。市中有發行所。品類甚繁。陳廠

規模最大。編置最新工人千三百餘人。男女各半。所製以鞋底爲大宗。帽與玩具次之。近始試製汽車。人力車。及自轉車輪帶。聘一英人工程師。月薪優權。大而成績尙未見也。其發行所各埠有之。聞張陳兩家。今皆向京滬推廣商場。前途尙未可量。林多樹膠園。其廠專製生貨。規模亦大。附近爲其別墅。顏曰滙華。爲星加坡同盟會發祥地。又爲第二次革命亡命客。逋逃藪。孫中山。岑西林。胡漢民。陳競存。李烈鈞。汪精衛。林虎。張繼。均曾寓此。有相片墨蹟甚多。又參觀王水斗之黃梨（卽鳳梨一名波羅蜜）工廠。曾幾生之西米工廠。盧奐成之染料工廠。多用人工。不用機器。華僑實業大概如此。

大資本家

此間大資本家。首推閩人黃仲涵君。卽顧少川君之新丈人峯也。黃君生爪哇。年六十以來。以製糖業起家。擁貲不可計數。據云。舉其所有散之國民。每人可得壹圓以上。蓋四五萬萬矣。向居荷屬。因避苛稅。僑厲英屬。聞余名願一見。言資本主義。首領欲與社會主義。首領接談也。人極藹然。可親。英語頗能達意。自述少時工作之苦。歷年經營之難。寄人籬下。終非長策。擬內渡廈門。營菟裘以終老。在英屬并無製造業。惟爲大地主。大債權家。兼營轉運交易事。經理甘清泗君。操國語。通英文。治事敏捷。無倫。接人謙和有禮。黃夙倚之。如左右手。余見黃時。甘亦在座。乃不三日。遽暴疾死。人咸悼之。陳嘉庚君爲資本家後起之秀。其人年四十

餘短小精悍。陰鷲深刻。耐勞苦。好沉思。重實行。寡言笑。女夫李光前君。爲之運籌帷幄中。張永福君。林義順君。皆奔走革命多年。今則張祖孫而林祖陳。林數回國。廣交遊。新被命爲僑務局副總裁。與黃陳又皆兒女親家。張則薑桂之性。一意孤行。屢經挫折。張之經理人蔡奮初君。林之經理人邵甘棠君。皆社交能手。王水斗君出身苦工。急公興學。財產雖不足視諸大資本家。而好名好勝之心特盛。社會交口稱道之。陸運懷。連日兄弟藉餘。擁厚資。其經理人歐陽雪峯君。善能將順其美。有時爲義輸財。黃兆珪君亦世家子。留學英倫。會長廣州法庭。現充本島律師。其兄弟與陸氏兄弟均再傳之大資本家。席豐履厚。養尊處優。無復艱難締造之精神矣。其非閩粵人之資本家。則有雲南明紹珍及浙江湯蟄仙公子。均有大樹膠園。

邱菽園君

總領事羅昌君介紹。往見星洲厲公邱菽園君。君生此間。故資本家子。內渡求學。少年而撥巍科。詩酒豪情。湖海雅望。傾倒一時。康南海倡議變法。君首先響應之。代表華僑晉京上書。并輸資鉅萬。爲新政經費。政變後不復出家財。亦散盡。今年五十許。蟄居一室中。逃禪以自晦。惟中酒時。尙抵掌慷慨談天下事。如二十年前也。生平著作等身。今亦半歸放佚。檢出紅樓夢分詠詩一冊。揮塵拾遺二冊見贈。又出示所藏古今印章。所謂五百石洞天也。今存者

惟數十方矣。書畫則黃山谷書蘇東坡大江東去詞。曹守先題跋。米友仁畫青綠山水。趙仲穆。倪雲林題跋。黃石齋書五律六章。皆希世之珍也。自言家傳長物典質殆盡。僅有此耳。余勸其回國重尋朋友文字之樂。終勝枯坐空谷中。君謾語曰。吾神遊諸天。到處通明無礙。不出戶庭。亦不感離索也。憶曩見康南海時。勸其出洋講學。亦答以此語。其信有所得耶。抑強作達觀耶。女公子鳴權。年甫及笄。畢業南洋女學師範科。今爲母校助教。明慧過人。嗜小說家言。書報不離手。余亦勸其回國求學。菽園既不治生產。方丁內艱。兄弟同居。食指又繁。家人多工作自活。轉得玉成之道矣。臨別。余贈以詩。獅子島中君醒獅。百無聞見祇低眉。聞緜貝葉旁行字。悔著風花側豔詞。五百洞天探袖得。三千世界費神思。卅年湖海游仙夢。散盡黃金剩鬢絲。菽園亦報以二十八字。丈室觀生定後身。憑誰入座策頻呻。調獅故技差知勸。又見開荒伏虎人。

演說大會

星島華僑爲余籌備歡迎大會。由二十學校聯合發起。各界自由參加。十一月廿六日假座中華戲院舉行。到者約四千人。女子占四分之一。華僑中學校長魯士毅君被推爲臨時主席。校長及各團體代表均列坐左右。養正學校音樂隊奏樂。唱國歌及歡迎歌。各代表致歡迎詞。余演說約二小時。不用通譯。聞者祇解其大意。而鼓掌懽呼。熱情涌現。可感亦可媿也。

會場秩序頗佳。是日酷熱。人又擁擠。然中途無散去者。僑衆多不通國語。然無喧譁談笑起立游行者。周君南君告余。人數之衆多。秩序之整飭。此爲空前盛典矣。會畢茶點談話。復同攝影。因南洋無迴旋照相機。不能容納多人。故祇照各學校校長及各團體代表數十人。而羣衆悉未得與。殊爲憾事。嗣見各埠無不如此。照相幾爲廣州人專利營業。手法尙佳。而均無迴旋照相機。此亦僑胞習於苟簡憚於改進之一證也。

女校茶話

中華戲院大會之外。各處歡迎殆無虛日。其最可紀念者。則南洋南華兩女校茶話會事。南洋在十一月廿七日。南華在三十日。均由學生自治會爲主體召集之。校長教職員特居指導地位而已。屆期有學生代表以汽車來迓。會場即在校前隙地。几案坐位排列井井。并陳鮮花生果數十種。汽水。冰膏。糖飴。餅餌。纍纍滿前。味多未嘗。名亦不悉。芳鮮甘冽。口頗生香。余最嗜金蕉。鳳梨。椰乳。及人心果。又有留連。風味特奇。愛食者但覺其香。不愛者則但聞其臭。非土生往往不敢嚮邇。而余亦嗜之。會中諸生環坐發問。或自抒意見。或提出難題。就余解決。尤多願聞歐美各國女界近狀。及內地女學發達如何。余一一答以梗概。諸生皆土生。而國語皆嫻熟。且關心國事。似尤勝男子。其自動教育之精神。亦非內地女學所及。兩校聯合互助進行。高才生來謁談者。有胡怡顏。何聯珍。尹振雄。黃素娥。黃志明。譚志精。黃若蘭。楊

澤蘅、黃玉如、岑月柱、諸君。教員則閩粵籍外。有黃詠君、長沙古稻田女師畢業。嚴冰君、上海女子體育學校畢業。王淑皇君、北京女高師畢業。王希明、李玉翠兩君均燕京大學女子部畢業。茶話散會後。復承兩校長約晚餐。并同觀馬來戲。教員鍾文卿君通國語、英語、馬來語。爲講解。甚有味。

游覽名勝

星島最勝處在海岸及森林中。當晚涼時。乘汽車周遊一過。令人作世外桃源想。又有蓄水池三。皆以人工點綴天然。彷彿湖山佳境。植物園奇花異卉。萬紫千紅。松鼠獼猴跳擲自在。又有一溫泉。本華人所發見。今售與英人製汽水。甚獲利。中一井熱如沸湯。附近土皆焦黑。以上均距市甚遠。市中有博物館、圖書館。規模不甚崇闊。博物館雜陳歷史遺蹟。土人手工及動植礦物標本。華僑出品亦靡於其間。但無上等美術可觀。圖書館除廳事外。竟不令華人入覽。待遇之不平如此。島中有高阜可觀日出。味爽及薄暮時。常見游人停車坐待。往往數十乘相屬。蓋氣候炎燠。出游自以早晚爲最宜也。

各教廟堂

華僑多佞佛。各會館均有雜祀。而純粹佛寺則推雙林寺爲最大。寺在郊外。光緒庚子漳商劉金福等所創建。工程壯麗可觀。第一進山門。前有戲臺。第二進天王殿。第三進大雄寶殿。

第四進法堂方丈。左右院落。前後叢林。極有體制。所費蓋數十萬。又有地名萬壽山者。有玉皇殿。觀音堂。諸勝。此皆離會館而獨立者。馬來人印度人多信回教。其廟堂亦極莊嚴。又有婆羅門教堂。陳禽獸神怪塑像。地皆石鋪。屋皆金飾。神像則珠寶嵌鑲。香花供養。牛乳沐浴。膜拜頂禮。日必數起。參觀者必脫履而後入。華僑多不肯往。余特約與偕行。此固觀風問俗者所有事也。

土人生活

華僑外自以馬來土著爲多。其骨格膚色頗類華人。故歷史有馬援南征部下留存者之曲說。又譯爲巫來由。地氣既熱。生活又易。是以天性懶惰。無進步思想。所居皆茅屋或版屋。類日本式。而精潔則遠遜之。所衣惟一紗籠。以雜色布縫成。男子繫及腰際。女子則兼蔽乳峯。上衣間有着短衫者。則歐化之漸也。女子頭上或別罩一紗籠。華僑土生往往效其裝束。而加以改良。彷彿和服。至爲美觀。聞首飾頸飾手釧脚釧。費數千金云。所食則白飯椰油。拌以加利。盛以蕉葉。指撮啖之。右手搏飯。左手拭穢。不可亂也。華僑土生亦多不用箸。而用手。眞變於夷矣。馬來人外有印度人。亞刺伯人。印度人上等等者爲醫士。中等者爲司閽。下等等者爲苦力。亞刺伯人多爲珠寶商及兌換商。今其族頗有大資本家。駸駸乎凌駕華僑而上之。蓋華僑之所以制勝者。在耐勞苦。善居積。一勤一儉。非歐人馬來人所能及。願印度人亞刺

伯人則尤勤。尤儉於華人。而華人客氣自用。故步自封。尙輕視此種人。豈以天倖爲可常邀也哉。馬來人喜用椰油塗頭面。印度人又喜刷紅白粉於眉目間。如戲臺淨丑。聞亦宗教儀式。不止妝飾美觀也。

南大募捐

余此行雖爲游歷講學而來。顧南方大學新築校舍。立需鉅資。初未嘗無乘間募捐之想。詎事實有不盡如人意者。一則樹膠失敗。商業凋零。維持爲難。挹注無望。二則已有多校專人募捐。不欲效顰。轉取憎厭。三則沿門托鉢。勢不可行。集腋成裘。得亦無幾。且大學非慈善事業。個人又不能與資本家周旋。惟向熱心同情者。偶一陳說而已。前華僑教育會會長黃肖巖君見義勇爲。提議組織一委員會。代本校向各界宣傳。余甚踴之。因於十二月七日召集成立。計凡八人。黃肖巖、莊惠泉、陳景蘭、黃淵鑑、胡載坤、曾幾生、黎寬裕、周君南是也。草擬辦法。分途進行。公推陳景蘭君爲收款專員。卽假星島成源、逢源兩號爲通訊機關。并攝影紀念。諸君厚誼。爲余補過。南大前途實利賴之矣。

車站送別

十二月八日晚八時。由星加坡炭克路車站 (Tank Road Station) 乘快車赴吉隆坡。男女友人到站送行者二百餘。各校各團體均有代表。南洋、南華、中華、三女校師生尤夥。旅客咸

屬目焉。蓋前此所不經見也。余一一握手作別。汽笛一聲。素巾飛舞。不覺黯然。尤有數人躡足追奔。至里許而後返。眞感不絕於心矣。留星兩週。備蒙優遇。除上述諸友外。尙有中華書局經理施伯謨君。屢厚款。余聞粵潮瓊各菜館均導往嘗新。徒饋啜來。啞然自笑。然蓋簪之樂。不可忘也。施君崇明人。本教育家。喜填小詞。

第二編 柔佛

海峽長堤

星島與馬來半島隔一海峽。交通向以舟楫。十年前議築長堤。今始落成。有鐵道。汽車道。人行道。蔚然一大工程也。由星島至海峽橫斷約二十英里。可乘汽車。或自炭克路車站乘火車。堤非甚長。步行約二十分時可竟。兩旁漁舟出沒。風帆上下。大小輪船亦間碇泊於此。一日清晨。余偕友人數輩乘汽車來。時隄上汽車道未開放。款步而過。朝日初升。尙不炎熱。乃行甫及半。忽然大雨。徧體沾濡。又無避處。疾趨對岸。已極淋漓之致矣。蓋馬來氣候終年如一。如內地四五月間。赤道下日光本極烈。幸有風雨調劑之。所謂四時皆是夏。一雨便成秋也。雨來無時。亦不甚久。如吾國暑天之過雲雨然。

柔佛王國

馬來半島接近星島處爲柔佛王國。Johore 屬英保護。但未入聯邦。故其司法尙獨立也。地

產樹膠、鳳梨、椰子、檳榔。又有錫鑛。華僑亦數千人。柔佛故王曾游英國。較有思想。今王美丰儀工媚術。女子多被吸引。英人華人大家閨秀亦時入其彀中。英國某總督之女公子。嫁有日矣。見王傾心。遂以身獻。總督深恨之。假事幽王別墅。出入不聽自由。王賄監者。喬妝夜遊。今總督易人。王益無禁束。然亦皤然老矣。聞馬來諸邦中。惟霹靂王最有名。曾留英大學畢業。自立法律專校。今馬來法官皆出其門下。次即柔佛王。智識勢力比較爲優。惜其內作色荒。不能有所建樹也。

馬來王宮

馬來王宮西式建築。頗稱壯觀。四圍苑囿。廣袤里許。動植咸備。鬃鬣公園。宮在中央高處。門口守衛綦嚴。王長居郊外離宮。惟間日到此一視事耳。星期日開放遊觀。余等之來。適非其時。廢然將返。因思錢可通神。各國一律。招監者語賄以一圓。居然首肯。嚮導俱入。見王朝殿。治事室。休憩室。及食堂。寢宮。一如歐西制。惟具體而微。陳設有中國羹器。繡貨。又見清代頒賞前王之紅頂朝冠并寶刀。不勝今昔盛衰之感。出時監者更有所索。再予以一圓。乃額手稱謝而退。

回教大堂

星島有回教堂多處。而皆不如柔佛大禮拜寺之莊嚴。寺在王宮附近。內外以雲母石構成。

脫履升階。下臨清池。參拜者必洗濯而後敢入。中設主教座。金碧輝煌。燃一長明燈。注油斗許。而光燄甚微。天花板雕鏤絕精。藻繪可玩。全寺惟此一堂。高大可容數千人。兩旁皆有複室。門窗扇閉。不知其何用也。此建築雖帶東方風氣。而純依西方法程。知其經始必在英領以後矣。參拜者雖平日不乏人。均合掌向天。駢膝貼地。口喃喃若有所祈。各宗教儀式一也。

寬柔學校

柔佛一華僑學校曰寬柔。聞余之來。臨時開會。歡迎演說。校長教員皆通國語。有暨南學校畢業者。學生凡五六十人。分爲四班。地甚踳蹶。據言前次星島歡迎大會時。教員有過海往聽者。今見余到此。不可不使學生一見聞之。余重違其意。爲少留須臾。并向諸生略述所感。其實諸生多幼稚。又不解國語。惟予以印象而已。瀕行索榜書爲紀念。立揮南方之強四字應之。

黃梨工廠

柔佛郊外有黃梨工廠多處。而劉登鼎一廠爲大。承以汽車迓往參觀。工人百餘。兼用機器。裝置罐頭。運銷歐陸。主人檢其最精美者。分貯冰盤。徧餉座客。飽餐而歸。盡一日以遊一國。乘末次火車返星島。則已在夜深人靜時矣。

第二編 吉隆坡

吉隆到著

吉隆坡 Kuala Lumpur 爲英屬馬來聯邦卽所謂四州府者之首都屬雪蘭莪 Selango 華僑來此亦最早而最多。自星加坡乘快車約十時可達。車分三等。頭二均有睡位。余以十二月九日早到。江文炳君。戴迺棠君以汽車來迎。江君鄂人。第一次革命有功。第二次革命亡走。遂留此不歸。以醫爲業。妻子均來。戴君則南亞公司主人也。吉隆坡車站建築爲馬來半島冠。道路屋宇亦一律整潔。蓋開闢晚故規畫新也。戴君介紹往國民黨支部小憩。承留下榻其間。嗣聞此間多客屬人。故此支部隸陳競存派下。英政府亦不甚注意及之。而別有秘密支部。仍戴中山。相爭甚烈。翌日蒙潮商陳本初君約移寓酒商公所。余亦甚喜脫此是非場也。

葉阿來事

有惠州人（一說梅縣人）葉阿來者。咸同年間偕其鄉人流寓此間。櫛風雨。烈山澤。驅土人而自踞一隅。衆皆歸附之。會馬來王室內訌。葉代平其亂。因取得政權。王特守府而已。比英勢力自星島內侵。葉聘英人爲顧問。權遂旁落。寢不自保。卒納款焉。英封葉甲必丹。俾領華僑事。而自與馬來王室訂約。夷爲保護國。阿來死。莫以其族人阿石爲甲必丹。阿石死。葉觀盛者繼之。觀盛死。遂廢此職。而華僑直隸華民政務司矣。阿來妻八十餘。尙健在。英政府參

養之子則貧無立錫地。今吉隆坡有大街名阿來。阿來一代經營。可徵者止此而已。

華民談話

葉觀盛子大池。大地主兼資本家。曾內渡服官。能國語英語。今爲華民政務司顧問。余在星島羅總領事席上曾一見之。到吉隆坡時。投刺訪談。屬爲介紹。一見華民政務司長官。禮也。官年四十餘。面目有秋氣。似恭而實倨。似誠而實狡。索余護照。詰余來意。余答如在星島時。於余生平知之甚稔。鈎稽百出。故炫神奇。袁項城之關係。孫中山之往來。劉師復之辨駁。陳獨秀之異同。在美在歐之行止。一一發問。余亦一一答復。不假思索。不少隱諱。并爲略陳中國近來青年思想之變遷。社會運動之進步。此君復問在俄在德是否與印度革命領袖交驩。曾否到其本部機關演說。并歷舉姓名以叩。余言實有其事。但向未參加其運動。唯以友誼相過從而已。且中國革命尙無結果。寧有餘勇越俎代謀。大英帝國億萬年有道之長。甚可不必以區區爲介介。言下大笑。此君亦粲然。頓易親善態度。又縱談約一小時。乃歎然握手爲別。別時余勸以更赴中國游學。君曰。余垂老矣。學亦無用。行就死耳。余曰。君必勿死。君死誰則保護吾華民者。君知爲虐。而無以爲難也。嗣後探聞英政府偵諜制度最精。余未到時。已將余相片著作及各方面所得報告鈔寄全份。備參考之資。此一席話又添入余個人歷史中。分寄他處去矣。葉君謁華民政務司極足恭。聽余抗論。數觥萬狀。坐不寧席。嗣見

余等談笑甚驩。面始有人色。蓋華民政務司之積威如此。

游觀街市

吉隆坡市視星島僅三之一。熱鬧不及。而整潔過之。華僑商店鱗次櫛比。建築皆爲二三階。無高下懸絕者。娛樂場及飲食館亦隨處皆是。尤多娼家。大抵廣州人。其妝飾絕新奇。面上塗白粉。故使不勻淨。望之如花紋。短衫窄袴。赤足拖鞋。而兩耳四肢均繫巨環。日本娼家尤極下等。白晝接客。馬來人印度人爭趨之。星島多粵妓。而無日妓。聞其領事嚴禁止之。粵妓亦別劃區域。不與商民雜居。此間則散布於舖戶與住戶之間。含笑倚門。招搖過市。殊不雅觀。

參觀名勝

吉隆坡建築最壯麗者爲車站。市廳及各官署。均以墜石雕刻砌成。其結構至爲特色。蓋折中東西形式。而又適合熱帶氣候者。深簷蔽日。廣牖通風。尤有天窗。以疏空氣。更設電扇。彌覺清涼。治事其中。毫無所苦。普通居室視星島爲寬展。此亦商埠新闢故然。又其公園及儲水池亦較星島多天然之趣。汽車週游一過。惜不及仔細參詳也。博物館圖書館無足觀。可觀者仍以郊野風景爲勝。

參觀學校

此間最大學校曰尊孔。乃清光緒間康梁黨人來此所創立。嗣復新築校舍。規模愈爲擴充。校踞一高阜。全市在望中。禮堂可容千人。茲有學生四百餘人。皆兩等。無中學。聞其內部意見紛歧。風潮屢起而未已。至可惜也。此外有中國學校。關智學校。培才學校。育才學校。柏屏義校。運懷義校等。均草草一參觀。女學則坤成最大。校長胡學芬。君長沙古稻田女師畢業。教員亦多湘人。學生之成績。與精神。視星島南洋南華兩校。可鼎足無媿色。人數亦二百餘。又柏榮女學校。成立有年。顧限於地。無發展。培德女學校。開辦未久。發起者乃粵人李鏡如之女公子名少玲。年甫笄也。現因病回國。其嫂氏阮玉蓮。君代任校事。禮堂懸少玲女士玉照。韶秀如天人。聞華僑女子。向不着冠。行酷日中。非便。女士首倡以通草白布製爲大帽。自御之。并令全校女生御之。他校亦漸仿行。全市風氣一變。余甚望南洋他埠女界之悉聞風而興起也。此事在熱帶關係衛生。非尠。女士之功德大矣哉。

平民學校

余到吉隆坡。首先單獨開會。歡迎者爲平民學校。校爲國民黨人所發起。并帶共產黨色彩。在此間最爲極左進步者也。英政府時注目之。余演說時。偵探亦雜聽衆中。有韓國祥君者。鄂人。充中學校教員。時與國民黨共產黨人書札往還。余演說之日。警吏入其室。席捲所有而去。聞內中黨籍及黨員通信簿。又日記筆記等。皆極有關係。今均在官廳。手韓君是

日公然到會場。余演說畢。卽登台自述其所遭。并痛斥國際帝國主義國際資本主義之罪惡。聲色俱厲。聞者壯之。會畢卽時遁去。今尙不知其所在。蓋韓君知證據確鑿。必難倖免。故趁其尙未發作。落得傾吐爲快。然後一走了事。又運懷義校教員聶國楨君。亦鄂人。韓君之友。年少氣盛。而才思敏捷。文筆流利。余亦愛之重之。又有南洋評論社者。其社員亦英政府目爲不良分子者也。有湘人袁英君。代表來見。并出評論數冊相詰。聞編輯印刷均煞費經營。并開一夜學。男女同班。甫一月餘。英政府勒令停辦。

演說大會

余在吉隆坡大規模演說二次。一次十二月十一日在尊孔學校。各校師生皆整隊來。各界亦自由加入。男女凡千五百餘人。一次十二月十二日在同慶戲院。假演劇休憩之時。演說三十分鐘。亦羣衆宣傳之意也。其餘各團體各學校參觀時皆有演說。今已不復記省矣。有青年益賽會者。亦含宗教性質。而與普通青年會不同。開會歡迎。茶點款待。亦有長時間之演說。然不知何故。英政府對此會亦視同過激黨人。大抵華僑團體稍具進步思想而喜爲社會運動者。均英政府所欲一網打盡者也。

二十二行

星島無工人聯合團體。而吉隆坡反先有之。所謂二十二行是也。宣統末年。酒商行首先成

立嗣是各行踵起。至去年而得二十二行。聞余之來。議開會歡迎。擬假座戲院。有成說矣。主席某君審慎太過。具稟政府請予核許。政府故閣壓之。而余行色匆遽。勢不可待也。因先假酒商公所召集代表茶會。到者五十餘人。余徧贈以新社會主義新民主主義說明書。并爲條陳前途進行之方案。聽者似能了然。聞各行初成立時。皆業主與傭工相參。其後漸分爲二。曰東家曰西家。蓋利害不同。不能不兩立也。各行本無往來。因多共同事情。始開聯席會議。今則有常設輪值之主席矣。工團發展之過程。一一與余理想相印證。英政府原不重視之。今則以種種關係。不能不利用之。與華僑爲間接之交涉。蓋駸駸乎成爲一種不可侮之勢力。不可廢之機關矣。倘遵余方案以進行。其成就必更有始願所不及者。諸工團勉乎哉。

坤成茶會

坤成女學亦踵星島南洋、南華兩校先例。爲余特開一茶話會。亦由學生自治會發起召集。於十二月十三日舉行。會場即在校中大禮堂。諸生圍坐。各出問題。中學班代表請余講歐美各國女權運動。師範班代表請余講人生觀。小學班代表則訊余回國求學之手續。余一如其意答之。互三小時而後散。該校助教盧寶羣、羅美庸、郭常羣、劉秀梅四君。均約明夏投入南大肄業。美術科畢業生龍秀霞君資質聰明。學行優等。而家境最孤寒。蓄志回國求學者三年。至今未能措資。言時淚涔涔下。余與校長協謀。玉成之。高小學生余志超君年

甫十二。岐嶷如成人。演說尤有條理。可造之才也。余常覺華僑學生較內地富於感情。而勇於進取。校其成績。則手工美術特爲優長。科學次之。國學習字頗工。而作文略遜。英語程度最低。此固通男女各校而大體相同者也。

益羣報館

吉隆坡華字報僅一家。曰益羣。爲民黨言論機關。主筆潮人許超循君。許甦魂君。蓋大小阮也。兩君並有社會主義之傾向。余此來極承照料。并代宣傳。超循君兩陪余往遊巴生埠。甦魂君更遠送至檳榔嶼。余之至酒商公所也。其總理陳本初君招待最爲殷勤。亦由兩君先爲道地。而然。兩君皆中學畢業程度。有志回國。或出洋留學。徒以飢驅囊筆。不遑更求深造。是豈兩君個人之不幸哉。余見南洋各報主筆各校教員往往同一境遇。同一感慨。蓋青年遠志埋沒。此中者多矣。又一主筆何鶴影君。贈余長律。依韻和之。飄然浮海。又南來。一羣乘風破浪開。島國優游聊卒歲。江關蕭瑟孰憐才。每迴青眼求傾國。不信芳心化劫灰。桃李成陰春未老。好花曾早十年栽。末二句謂南洋各女校教員。有余廿年前在京創辦女校學生。或其再傳弟子也。

華視學官

英屬自取締華僑學校勒令註冊以來。特設提學使職。正副各一。英人任之。下設華人視學

官若干。有粵人陳君葆君。曾畢業香港大學。今充吉隆坡視學官。借葉觀盛子寶清君來訪。談年二十八。九通國語。英語。斐然。一可造之青年也。據云。任職非其本意。雙方均極不易處。余頗聞華僑學界。譏其媚外。以自固。知其不能見諒於人矣。又云。政府將自編輯漢文教科書。頒布通行。更將設立一師範學校。專備華僑師資。嗣後僑校將不許自選課本。自聘教員。此令果行。可爲僑校前途一哭。而僑胞今尙不知注意及此。并有多校爭黨見。鬧意氣。起風潮。互控於提學使。請其判決調處者。更可哭矣。葉君言師校成立。陳君行爲校長。余誠不知其將何以自處也。

壽星山洞

吉隆坡郊外一大山巖。南洋有數名勝也。乘汽車時許可達。石磴盤曲。攀援而升。約數百級。乃抵洞口。中間穹窿。廣可數畝。清泉滴瀝。石乳峻峭。有陰森氣。幸日光自山前後射進。尙明敞。可以居人。有印度老僧數人。鑿石壁。設佛像。焚修其間。外來朝拜亦不拒也。洞中多馴鳥獸。見人初不逃匿。擲以食物。則爭來就之。入處鑄壽星巖三大字。硃書如新。不知何年何人筆也。又有極樂國三大字。墨塗石上。書法較劣。其餘漢文。英文。日文。馬來文。印度文。題字極多。不可盡讀矣。洞中更有一洞。黑闇如漆。蛇行可進。聞通他山出口。又附近尙有一更大巖穴。但必秉炬而後可行。其中景況尤奇。以陰雨不果遊。余體肥重。拙於登躋。賴印度童子

數輩扶掖而上下。中途休息十數次。尙額汗如雨下也。

參觀錫鑛

馬來半島錫鑛素旺。三十年來採掘殆盡。然尙有鑛山多處。頗獲厚利。余在吉隆坡參觀一潮人李姓之錫鑛廠。有工人三百餘。鑛穴甚深。和土掘出。以水洗之。錫留沙去。提鍊成粒。謂之錫米。淘揀輸送。均用電機。聞此鑛已開十年。純利達百萬以上。錫價甚貴。鄉導者指屋角一堆示余曰。卽此可沽八千餘金也。是日陰雨。跋涉甚苦。比出鑛山。索鏡自照。面目黧黑。衣服垢穢。儼然一鑛工矣。

車站送行

余留吉隆坡僅六日。十二月十四日晚八時乘快車向檳榔嶼而行。各界到車站送別者百餘人。坤成女學校長教員暨師範生均到。雁行鵠立。互一小時。一如星島出發時情況。余憑車牕向大衆鄭重贈言。祝其早日回國共學共事。車行甚遠。尙見白帽素巾。悠揚黑影中。又一時許。抵車站曰萬撓。Manow。忽聞繁聲呼江先生。則坤成學生有寓近此間者凡十數人。冒夜來握別也。桃花潭水。何以過之。

第四編 巴生

巴生途中

距吉隆坡四十英里有巴生。一名巴雙。Port Swetsham 爲馬來聯邦唯一海港。亦爲其最早之商埠。開關遠在吉隆坡前。今則繁盛迥不如之。往來大洋之郵船商船有時尙停泊其處。自吉隆坡火車汽車均可通。該埠商學界聞余到吉隆坡。專柬請往一遊。前後兩次。均乘汽車。約一時許。直達市中。中經橋梁多處。沿途均橡樹林。每晨工人割皮取乳。承以蠶杯。傾之木桶。雪白如漿。大約種六七年即可割。二三十年即枯死。死則樹身先折。而樹根猶存。變深紅色。光怪陸離。槎枒百出。遠望之如老魅也。巴生無他商業。惟以樹膠出口爲大宗。自市價跌落。生意蕭條。昨今兩年始見轉機。商場或尙有恢復之望也。

樹膠公所

巴生最大團體樹膠公所總理閩人顏維漢君。盛筵招待。全埠商學名流咸在。歷有年逾七十者數人。爲言英人之得馬來聯邦。其事易如破竹。諸王內訌。葉阿來調停無效。英自星島派軍艦一艘。軍官二人。兵士五十。到巴生埠。開炮九聲。而馬來王俯首授降。葉阿來亦拱手歛避矣。余憶德人之得吾青島。其行徑乃與此絕類。以泱泱大國而不能自保其咽喉。使德人不費一兵。不折一矢。談笑而得之。彼馬來王又何足責。而吾國今日諸藩鎮尙日步馬來王後塵。恐五族二十二省錦繡山河。皆將爲巴生續也。尙何言哉。樹膠公所以比例徵收營業稅。積資頗豐。全埠學校經費皆取給焉。顏君與何海鳴爲至交。何所出僑務雜誌。頗代顏

鼓吹。顏固此間商界一人才也。

學校演說

巴生有中華學校、中華女學、及共和學校。聯合請余演說。卽假共和禮堂爲會場。蓋三校惟共和爲大也。校長越君、鄂人。其夫人曾君。卽長中華女學。中華校長口君。則閩人。而暨南畢業者也。三校共有學生約五百人。中華學校教員湘人任培智君。願入南大肄業。年假後卽內渡。助教朱曉虹君亦願同行。而格於人事不果。與余同乘。備述雌伏之苦。雄飛之難。余亦惟有以有志竟成空言慰藉而已。朱君亦吉隆坡坤成畢業生。雖土生而爛國語。落落有內地大家風。

港口風景

巴生港口距市匪遙。顏維漢君約往同遊。天雨初晴。海平如鏡。狀至岑寂。是日並無大船傍岸。棧橋伸入水次。有馬來人、印度人數十。縱橫偃臥其間。若輩皆搬運工人。無船到則無所事事。終日昏睡而已。華人亦有染此惡習者。幕天席地。到處皆寢臺也。熱帶居民生活簡單。懶惰成性。於此亦可見之。

第五編 檳榔嶼

檳城大略

檳榔一作庇能。Penang 通稱加一嶼字。或稱檳城。因海濱有英人古城遺蹟。今藉爲升旗懸燈處矣。爲馬來半島西北一小島。周四十餘英里。余此次來遊兩度。一由吉隆坡乘夜快車來。約十小時抵撲賴 Prai 站。實檳城對岸越斯來 Wellesley 省之中心。越斯來省乃由馬來聯邦割出。爲英直轄殖民地。猶香港之有九龍也。自此過渡約十五分而達檳城。計留七日。一由仰光乘船來。約三日逕達檳城。計留五日。乃乘快車直赴盤谷。蓋仰光盤谷間舟車皆不便。必須迂道檳城。猶之由西貢赴馬尼拉者必須迂道香港也。檳城亦東西交通要道。英日郵船所經行。其商務之盛。與中國殖民之多。均次於星加坡。然在南洋各屬各埠中。余最愛之。是有數因。一、氣候溫和。寒燠得中。風雨時若。常似春末夏初。從無酷暑。又無淫霖。二、風景秀麗。有山有海。有林有泉。公私花園。沿途皆是。升旗山之壯觀。極樂寺之勝構。丹絨莫雅之俊遊。彌寰宇間。吾見亦罕。三、市政整潔。城郊馳道四通八達。櫻欄交蔭。雜花送香。建築則中西折衷。疏密相稱。巧不傷雅。簡不嫌陋。內容小異而外觀大同。爽塏軒敞。尤爲特色。四、生活低廉。人口較大都市爲稀。而日用品乃至奢侈品。常覺供過於求。食宿費用。彷彿吾國蘇杭。衣服則冬夏一襲。貧富一律。特爲簡單。五、人情樸茂。民族雖異。待遇從同。各屬華僑。輯睦無間。外江移民。攜眷偕來。咸有如歸之樂。六、交游衆多。余所尤稔者。有老友陳宗山夫婦。榮渭陽兄弟。蔣愛真君。鄉人陳承謨夫婦。滬人王寄鷗夫婦。瓊人周錦英姊弟。故余於檳

城有特別感情。不自覺其洋洋而樂道也。

參觀學校

十二月十五日到橫城。承鄉人陳承謨君、閩商黃迴瀾君來迓。約往米業乃倉公所下榻。隨即參觀各學校。此間有一中學曰鍾靈。校長蘇人顧因明君。曾任上海南洋中學教員十年。到此二年。成績已見。適值該校開展覽會。圖畫一項最擅勝場。女校較大者則有福建女學。現無校長。教員六人。輪值主任。此外有中華學校。兩等十三班。學生五百餘人。人數最多。成立亦最早。附設孔聖會。聞康南海爲最初發起人。校長林君。請余臨時演說。又有台山學校。附設關帝廟中。韓江學校。附設潮州會館中。新江學校。附設邱氏宗祠中。中華女學。思明林女士創辦。華僑女學。恩平李女士創辦。尙有數處。均不甚大。且多放學。浮羅山背有大埔人公立之崇德學校。是日適行畢業禮。余便道過觀。并致頌詞。有名商務學校。工業學校者。及往觀則均普通小學。并不授商工常識。余意僑名實相符。實僑學一當務之急也。

學界家庭

南洋外江教育界人有家庭之樂者蓋罕。橫城則有滬人王寄鷗夏芬佩夫婦。一在鍾靈。一在福建。均授圖畫。論者或謂夏藝尤精。人亦有林下風。且通閩粵馬來語。服習此間風尙。有子女二人。居處甚樂。贛人陳承謨君。前年與無錫朱素英君結婚。今陳任光華日報編輯。而

朱任怡保一女學校長。已有一子。崇明陳宗山君。鼎革之交。卽識之。今亦任光華日報編輯。擊眷偕來。又新江校長王養吾君。鍾君教員汪起予君。均蘇人。均有家屬在此。小兒女輩均通國語。蘇語、粵語、閩語、英語、馬來語。蓋天然博言學家矣。其土生家庭之可紀者。則有周錦英君。世爲瓊人。生檳城。畢業英政府高等學校。父亡母存。有兩姊均已嫁。與其次姊錦緞同。教授福建女學。君專任英文。然其國文、國語、書法、圖畫。並皆佳妙。又擅長音樂。刺繡、唱歌、跳舞。蓋全才也。世稱美人。徒艷其色。若君德言容工。無一不備。吾不知何以稱之。與人言如春風。嘘拂。教授極循循善誘之能。暇則學爲中西文詩。或曼聲長哦。以自暢其天趣。余嘗與偕步海濱。風濤蕩漾。中間清歌一曲。不勝天上人間之感。少弟濟民。年甫十二。亦肄業英校。穎悟過人。尤愛從余遊。余每資爲鄉導。得略識檳城途徑。其家庭中融融洩洩。令人歎此間樂也。余南遊三閱月間。僑胞種種優待。惟前此從未一領略其家庭生活。蓋家庭類皆舊式。不可見人。或土生夷俗。不通國語。外江人又多不攜眷來。今檳城有此數家。可謂鳳毛麟角矣。

華民談話

檳城亦有華民政務司。余循例往見。主者頗謙和有禮。謂殖民政府對余已諒解。將不復多所注意。并告余政府所最忌者。乃與聞印度革命事。嗣聞人言。英屬華民政務司方購求余中西文著作已出版者。并使人撮譯余新俄遊記。藉知余對共產黨之意見及其關係。又電

上海英總領事徵余在滬行止。并屢向華僑探問余南遊之用意。區區微末。乃蒙大帝國垂青如此。眞異數矣。思之失笑。

全島周遊

到檳城之翌日。黃迴瀾君以汽車約遊全島。迴環四十八英里。沿海岸入山林。上下坡陀。蜿蜒層疊。路平而狹。又甚曲折。兩車相掠。動魄驚心。非善御者。不敢長驅而疾馳也。山林深處。黃君有樹膠園及別莊在焉。農工數十。均來自漳泉。婚於土婦。子女悉作馬來語。儼然自成一村。落種樹之外。兼藝園蔬。大馬雞豚。滿坑滿谷。又引泉鑿塘。蓄魚種種。黃君請余題莊名。并問余此間頗似西湖否。因書亦雲棲三字贈之。途中過一廟。廟前有戲臺。方演潮州劇。紅男綠女。雜沓喧闐。停車觀之。恍置身鄉社間。觀迎神賽會時也。

升旗山頂

檳城高處爲浮羅峯。其絕頂爲升旗山。總督行署在焉。十年前經始上山鐵道。余來時適落成。上下共分三站。高三千餘英尺。車以鐵索牽引而行。歷二十五分始達。四周一覽。萬象全收。迴憶香港之上山鐵道。兩處蓋隔水而相望也。山頂總督署外尙有大旅館一。亦攬風景之勝。鐵道旁附設人行便道。不知其幾千百級。聞有買勇健步登臨者。

佛教寺觀

馬來半島佛寺最大者爲檳城之極樂寺。寺在郊外。自市而往。電車須經行森林密箐中。沿途風景清奇無比。將到過一溪橋。捨車而行。拾級而上。凡數十折。乃見寺門。依山爲高。隨步換景。入之見巨石硃刻無量壽佛四字。方池中放生魚鱉無數。更上乃爲正殿。逐層漸升至藏經樓。則全島在望矣。寺在檳城甚有名。東西遊人題名者不絕。寺僧出示康更姓章太炎。湯蛰仙。日本東鄉。乃木兩大將。及英皇子筆蹟。并以素紙索書。信筆揮二十字曰。栖栖一代窮蹙。蹙四方仄。極樂將安求。雲山深處得。方丈本真赴暹羅。禮佛去。知客僧設素筵。相款談吐尚不甚俗。又有天公壇。在升旗山腰。琳宮絳闕。掩映綠蔭中。遠望如天半朱霞。又有青雲巖。俗名青龍寺。地不甚大。而殿中到處盤蛇。全身綠色。方首扁喙。大小不一。或粗如兒臂。或細如綵繩。撫之不驚。撥之蠕蠕而動。卽復蟠曲如舊。神像香案。燭臺花瓶。乃至鐘樓鼓架。經卷之上。無處無之。游人或購生雞卵予之。乘人不覺。一吸而盡。平時香火極盛。煙氣氤氳。蛇似安之。洵可異也。

法空禪師

檳城中有極樂寺下院曰觀音寺。住持僧法空。奇人也。來自泉州。居二十年矣。通國語。英語。習少林拳術。能舉石鼎。作旋風舞。又能書畫。擘窠大字。潑墨山水外。兼工小楷。細筆翎毛。尤有絕技。最善調犬。犬入其手。非惟馴善。并習技能。嘗參澳洲種一大犬。赴英國博覽會。比

賽得第一等金獎章。爲華人破天荒事。富豪陸運懷君以三千金購得之。今又調數犬備再賽。亦并蓄他獸。如猿猴。麕麝之屬。皆宛轉聽其指揮。又精園藝。自云生平未遇敵手云。

公園名勝

檳城有兩公園。一新一舊。皆有儲水池。皆在郊外山間。余曾屢游之。汽車可直達。但險峻處頗不易駕駛。園中馴猴極多。見人則伸掌索食。其海濱名勝則有地曰丹絨莫雅。Tanjong Mesia。沙灘潔白。如展氈。奇石環立。如張畫屏。一茶館。英名 Spring Tide。漢字譯粵音作斯棧低。余爲改題春潮館三字。海水浴罷。散步微倦。則品茗其中。或啖冰膏。甜香沁肺。市中古城近處有大草場。英名 Esplanade。平時爲球場。星期一、三、五日晚間音樂隊合奏。游人隨意坐臥傾聽。得意則談笑歌舞。皆絕妙羣衆行樂圖也。

檳城報館

檳城同盟會成立最早。向爲民黨一根據地。有光華日報者。民黨要人亡命時多曾任其主筆。今猶鼓吹不懈。十一月二十日爲十三週年紀念。全館大酺。余承招飲。并爲演說。又有南洋時報。亦民黨一言論機關。檳城新報則成立尤早。規模尤大。但向屬康梁一派。故與孫黨積不相能。該報并出英文日刊。聘英人爲主筆。其營業亦至發達。余之至也。三家一致表示歡迎。光華因陳承讓君鄉誼關係。過從尤稔。南洋則總理卽黃迴瀾君。檳城之總理湯君。主

筆李君亦晤談甚暢。余嘗謂公義與私交宜兩不相蒙。所望國內外輿論界諸君均持此態度以相周旋也。

新式團體

檳城新式團體有麗澤社。及明新社。如星島之有青年勵志社。行餘勵志社也。兩社皆爲余特開歡迎會。因皆得參觀其內容。接晤其要人。麗澤社址似較大。故設備亦較完。明新成立較晚。現方急起直追。其圖畫、音樂、新劇、運動等部。均已具有具體計畫。又檳城閱書報社。即今鍾靈中學校址。聞開辦時甚有精神。今漸渙散矣。此外舊式俱樂部。頗有基金雄厚。結構崇閱者。余無取焉爾。

戲園演說

檳城報界、學界、約同商界、工界。訂期十二月十八日假座一景戲院爲余開聯合歡迎大會。參與者二十五團體。到會者男女二千五百餘人。領事戴叔原君爲主席。余演說經傳譯爲閩語粵語。費三時半。方言不一。極感不快。願聽衆安坐至終。誠難能而可貴矣。僑商告余。檳城開會自來無此莊嚴也。余雖不盡解閩語粵語。演說時尤不願用國語外任何種語。但譯者疏漏處。往往爲是正之。恐其毫釐之差。而千里之謬也。領事戴君。粵之大埔人。生檳城。世爲商。其兄芷庭。曾官太守。君在戴少懷長部時。曾爲法曹。此間領事爲名譽職。不支官俸。

惟以護照簽字費供公費。余告戴君。中央積欠外交經費至一年有半。各使領署多謀下旗回國。轉不若名譽領事向不受薪者。尙能獨立於不敗之地也。會畢復承戴君招飲於此間最大旅館 *W. and O. Hotel*。肴饌絕佳。

臺報弁言

在檳城時得上海臺灣青年會來函。言將出季刊。屬以一言爲弁。游觀之暇。走筆應之。偶錄於此。三十年來志士仁人爭以亡國滅種禍至無日申儆國人。國人淡焉漠焉。或且笑爲憂天。不意臺灣同胞乃首當其衝而躬親其境。吾嘗思臺灣同胞蓋處人生所至不堪。而茹苦停辛。乃長忍此以終古。匪唯不能見諒於日人。乃至不能見諒於吾國人。日本既以殖民地視臺灣。不使與諸郡縣等。臺人有內附者。吾國人又異族畜之。其無賴則挺而走險。爲虎狼以噬人。惟優秀青年脫然來歸。恆思有所樹立。不欲以第一等大帝國國民自豪。而特揭櫫爲臺灣人。其遇可哀。其志尤可敬也。吾聞泉漳之間。有捐鉅資資緣入臺籍。以間接托庇於第一等大帝國者。豈真其性與人殊哉。爲淵毆魚。爲叢毆雀。誰爲爲之。蚩蚩者吾何責焉。今臺灣人在本土不敢言改革。並不敢言教育。其居留上海者。組織青年會。專從教育入手。蓋國破家亡。卽受教育之難已如此。顧吾國固儼然猶在。而吾民欲受教育亦難於登天。又安暇爲臺人悲哉。臺人勉之。人心一日不死。讀書種子一日不絕。雖謂臺灣未亡可也。

易翁碑記

蜀人易倩愚者。留檳有年。余來遊而翁適橫死。陳宗山、陳承謨兩君屬余爲書墓碣。并撰紀念碑文。偶錄於此。易翁倩愚之喪。其朋友弟子旣爲營葬立墓。復謀所以不朽之者。將建紀念碑於極樂寺。而諉余爲文。余初不識翁。游檳城之日。翁屬其鄉人某君先容請見。未果而遂以橫死。豈一面之緣亦有命耶。余海內外奔走二十餘年。屢瀕於危而不死。翁以頽齡背鄉景。碎首車下。埋魄異國。其動余感愴。又奚止如陽明之哀瘞旅而已。按陳君宗山所爲傳。翁四川富順人。清末客京師。主鄉校事。早入同盟會。辛亥之役。與其黨徒謀狙袁世凱。不中。狙良弼斃之。遜位之詔以下。任稽勳局科長一年。不自得。走廣東。充大元帥府秘書。復舍去。游南洋。爲檳城華僑日報主筆。未久停版。遂留不行。課徒自樂。尤好與勞工相往還。以爲此平民主義實踐之始。間爲詩歌。以發其鬱伊。有落花詞百首。不啻躬自悼也。民國十一年十二月十七日。解館返寓。猝遭汽車。陵轢而過。創重暈絕。越日而死。年六十有四。葬閩僑公墓。波羅知滑之原。蜀中方戰亂。其家事不得詳。歸骨無期。招魂無處。烏乎酷已。顧余念南洋華僑數百萬餘人。死者日必數百千輩。而翁獨得表章以垂久遠。卽此可推見其爲人。而足以爲後死者勸也。於是乎記之。

小游仙詞

第五編 檳榔嶼

留檳城時。有誦余少作無題斷句而相調者。曰。能復爲此否。余笑曰。江郎雖老。才未盡也。何故不能。因以一夜促成四律。命曰小游仙詞。本事不必傳。第作美人香草觀可耳。其一。十年湖海載愁多。又向天南喚奈何。別夢依依和夜月。橫流處處是春波。鮫珠的礫霏情淚。鳳吹參差發艷譟。悵望雲軒歸去遠。疏星長是隔銀河。其二。芳草天涯處處青。灞橋柳色接離亭。玉鸞繫恨當窗見。紫鳳傳歌隔座聽。乍酌眼波千日醉。驚聞眉語一時醒。河梁攜手成今昔。碧海青天共杳冥。其三。聞名初見便心傾。握手無言許目成。電扇香聞春四座。風車夢擁夜三更。臨流誰寫驚鴻影。入海難忘宿鷺盟。山上薜蘿山下路。明珠紅淚兩縱橫。其四。南國驚逢絕代人。簪花咏絮更鍼神。暗拋紅豆相思子。偶現曇花入劫身。鸚鵡眼中情脈脈。鷓鴣聲裏夢眞眞。月當頭夜催歸去。天上人間何處春。

兩次送行

余第一次離檳城在十二月廿二日夜十時。男女友人到步相送者數十。水淺巨艦不能泊岸。黃迴瀾君以重金專賃小輪。昇載往雙美號。時風起濤飛。又在深夜。余力辭諸友勿送。而黃迴瀾、陳宗山、陳承謨、王寄鷗、榮渭生、周錦緞、錦英、夏芳佩、朱素英諸君均冒險並載。中途一浪撼船。立左舷者衣履沾溼。全舟震盪。錦英幾仆。上軟梯時。大小兩輪高下懸絕。又顛簸互爲低昂。芳佩方有身。獨留未上。而錦英姊妹及素英君卒隨諸男友賈勇同登。握手道別。

而後去。余雖心感其誠。亦頗爲惴惴。幸是日適值仲冬之望。月明如晝。小舟去遠。尙見素巾數幅與浪花相映生輝也。第二次離檳城在一月十一日早八時。諸友知者極稀。惟陳宗山陳承謨兩君及周濟民君遠送過海。至檳賴車站。陳宗山索贈詩以紀十年離合之迹。余爲書一律。十年不相見。相見又天涯。去去長爲客。栖栖未有家。夢中滄海遠。詩外夕陽斜。避地留前約。崇明一片沙。及今思之。崇明一片沙。淮南未酬招隱之詩。檳城一帶水。文通先作銷魂之賦。海天俯仰。我勞如何。

第六編 仰光

華商船中

中國之招商輪船局與日本之郵船會社同年成立。四十餘年來。彼則巨艦百數。縱橫五洋。船長技師人才如鯽。我則長江近海尙不能與怡和太古日清爭衡。并大副二副無本國人。其他更無論矣。南洋一帶尙有中國商船。或自製。或賃用。或包辦。惟其船籍悉隸他國。船長技師亦悉爲他國人。往來檳榔嶼與緬甸之仰光 Rangoon 間者。本有英國 P. and O. Co. 及他公司。惟余夙聞海外華商輪船公司以林振宗所辦雙德字號爲最大。原有船三艘。一戰時轟毀。一觸礁沉沒。今惟一雙美碩果僅存。特留數日。趁附以行。乃一到船。卽大失所望。船年齒在六十以上。乃買英廢船重修者。內容機器不可知。外觀半已陳朽。零件損壞尤多。

房艙奇臭。甲板污穢。無插足處。男女廁卽在廚房左右。便溺時時流出。二三等搭客開飯時。如北京冬日施粥。人各一盃一盆。食來如蜂鬧衙。食盡如獸走壙。其大奇特奇者。尤有三事。一、床榻不設被褥。海中夜半薄寒中人。多病下痢。二、船員皆西餐。而頭等與二等客同中餐。若用西餐。每人每餐加收二元。仍不得與船員同席。三、船到仰光。在清晨六時。因碼頭泊有他船。候至午後一時許始傍岸。是日竟不開飯。全船各等客均枵腹。而船員及茶役則按時飽啖。旁若無人。三晝夜間。備嘗諸苦。愛國之代價如此。其後回檳榔時。改乘 P. and O. Co. 船。船價與雙美全同。而待遇則優勝十倍。嗚乎。中國航業之前途。國內如彼。國外如此。吾何望哉。

林振宗事

林振宗閩南人。幼來仰光。以煙賭起家。擁資數千萬。地產富甲一國。生平專工獻媚英人。英人亦假以詞色。而吮其脂膏。大戰前後。報効幾毀其家。政府獎以爵銜。英皇儲游緬時。徧賄各要人。請一臨其私第。歡迎準備費累鉅萬。皇儲但御汽車繞其門牆而過。林率妻子匍匐道左。觀者皆笑。而林自詡爲奇榮。僑民公益事不肯破一文。有廢地出售。華僑中學將如其值買之。嗣知爲校用。遂昂價二倍以阻其成。自置別莊兩處。一城一郊。皆壯麗如王者居。姬妾數十人。家中悉用英語。緬語。門立印捕。稽查至嚴。姬妾不任出。非親信者亦不聽入也。秋

間以交易事業失敗。一時周轉不及。債權人控之於理。將對簿公庭。前一夕仰藥死。余到仰光時。曾一瞻仰其別莊。屋頂高出雲表。金碧閃爍。夕陽返照中。而花徑半荒。重門深鎖。金屋中人更不可問矣。

華僑中學

仰光之有中學。蓋六年於茲矣。中間以風潮停辦者三次。而華僑財力雄厚。其建築與設備。乃每激而益進。余在雙美船中。遇新校長林我將君。亦閩籍僑民。留學內地十年。美洲十年。又徧遊歐亞諸國。故其人通達事體。特富幹濟之才。曾佐陳炯明治漳州市。政多出其手。今被推長中學。適新校舍落成。承約往參觀。覺氣象萬千。國內大學對之亦多媿色。林君告余地址及工程各費三十餘萬。又常年基本經費三萬。皆此間富商會邱兩姓公祠之捐款。仰光既出一林振宗。偏又有會邱兩家。與爲反比例。人之度量相越。豈不遠哉。林君自國內約來教育。家數人。有黃巖管望清君者。前京師大學師範生也。一別垂二十年。覲面幾不相識。余固早返初服。君亦長執教鞭。視同學少年。議長。總長。省長。由師而官者。衡以俗眼。似乎壯不如人。揆之本心。是爲用其所學。故余不爲君弔。而爲君賀。君同鄉同學。尙有柯璜君者。畢業後卽從事教育太原。二十年如一日。亦所謂平凡之巨人也。

天時地氣

自檳城而仰光。三晝夜間。氣候漸變。日中甚熱而夜半甚寒。炎涼反覆。頗覺不快。聞緬甸暹羅。安南。斐律賓。皆每年分晴雨兩節。大抵陽曆四月至十月爲雨節。十一月至翌年三月爲晴節。晴節尙涼爽。可人。雨節則溽暑不可耐。余來恰在天氣最佳時。然較之檳城四季皆春。已有下喬入幽之概。況道路修而不潔。研而不光。車惹塵飛。步防泥滑。通衢鬧市而外。往往藏垢納污。鼻觀眼簾多受刺戟。彷彿吾國之南北兩京。以視檳城。眞所謂回首玉堂如在天上矣。余留仰光旬日。忽忽常如在病中。同行林君暨新到中學教員數人均抱微恙。眠食大損。來此者恆不得免。其天時地氣之非佳可見。

佛教大盛

馬來半島本無文明可言。回教印度教諸寺觀亦多簡陋不足道。緬甸則固中印兩文化接觸一古國也。至今佛教猶盛。英人惟取政治經濟實權。宗教則仍放任以羈縻之。向例男子將成人。必爲僧數月或數年。而後得授室。爲僧時出家住寺。服黃袈裟。偏袒左肩。雖父母亦朝拜之。終身爲僧。彌見尊重。早起托鉢乞食。飽啖一兩次。過午卽齋戒。惟飲水。人家炊爨。必先飯僧。乃自進膳。大僧過時。遇者或合十。或膜拜。教育全權向在其手。智識階級此爲最高。英人本奴畜緬人。不爲多設學校。緬人有自立學校者。掌教猶是僧徒也。其迷信深入人心。普及社會。牢不可破。余徧歷世界。見可稱爲全佛教國者。今僅有緬甸與暹羅而已。

寺觀莊嚴

中國日本皆有大佛。然比之緬甸。直小巫見大巫耳。寺觀之莊嚴。亦不及其萬一。緬甸全境到處金塔。露頂矗立。仰光城尤彌望皆是。其著者曰大光塔。Shwe Dagon Pagoda。據山爲高。四門洞關。拾級而上。但覺五光十色。目眩神迷。棟宇門牆。悉施雕刻。嵌鑲珠寶。佛像靡麗。尤不待言。大抵金堆。否則玉琢。或坐或臥。香花瓔珞。圍繞周遭。一大塔居中。數十里外即可望見。小塔環拱。不可數計。均置佛像。自晨至夜。參拜者相踵。男婦伏地喃喃。恆亙數時不起。有中國僧人數輩。自寧波來請玉佛。每早必到此頂禮。寺門售香燭者。多於天竺普陀。聞塔頂皆真金。甃砌成。每逢雨節。溝瀆中細篩密布。沖下金屑日積。每年計值逾萬。三五年更鏤合塗飾一次。此外尙有一大佛寺。佛像兩尊。一在寺中。玉質趺坐。充塞全殿。殿廡雕繪人物極精。皆緬甸歷史故事。一在野外。石質橫臥。儼然山岳。不易攀躋。面目似埃及石刻。及西印度圖騰木刻。不類尋常佛像。此可異也。又近郊有九紋台。(地名譯音)玉佛一尊。高及尋丈。所有寺觀。凡參拜者。自山門卽須脫履。并不得著襪。中外人多苦之。余兩度游大光塔。并徧遊市內外各塔。赤足行熱砂碎石中。歷二小時而後出。每至皮膚拆裂。甚且血肉狼籍。然雖犧牲而不悔。蓋其代價滋可貴也。聞英皇儲入寺時。亦奉行俗禮。惟謹。以示懷柔之意。緬人果歡喜讚歎不已。



佛臥臥佛

仰光之臥佛大如山岳。人須攀援而升。然係石質。又在露天。彷彿埃及三角塔傍之人面獅身像。古拙醜惡。與法相莊嚴之義殊悖。自仰光乘快車二時許。有一站曰佩古。Pegu 以白玉臥佛著名。且建殿覆之。爲此邦大觀。余特往一遊。其地亦一城市。有華僑數千。并有煥文學校。是日元旦無人。自車站更乘馬車。約半時即見舳舻翼然。蹠足履雲。母石階上行。佛像赫然在望。白面朱唇。眉目漆黑。右臂袒露。曲而枕之。袈裟雜嵌五色寶石。間以珠鑽。腳板細鏤花紋。手指足趾大與人等。余巡行度之。自頂至踵約長百步。大佛之大。舉世罕儔。殿前亦有售鮮花香燭者。并施熱茶。茶爲緬產。香味非佳。然遠道日炙。跋涉而來。焦渴欲死。得此不啻藍橋之瓊漿矣。緬甸路軌用鐵枕。故車行喧聒可厭。頭二等雖不寬大。尙容坐臥。三等則重足而立。如滬寧之貧民小工車。望之殊苦。Pegu 閩音譯作佛臥。猶 Pegon 之譯大光皆循音傳義耳。

亡國慘狀

緬甸本我國藩屬。分北中南三部。英一戰而領仰光。再戰而逼瓦城。三戰而全滅之。如波蘭亡國之例。中間相距二十年。第三戰王室內訌。貴族賣國。如韓臣李完用。緬王被誘成禽。囚死印度。如粵督葉名琛。今王后猶存。英人幽閉之。全國夷爲郡縣。隸印度總督。但於仰光置

省長焉。軍隊皆印度人。政治由英政府獨斷。物質文明甚有進步。而租稅稠疊。刑罰煩苛。教育不興。生計日困。緬人漸感痛苦。頗思念前王。并有傾心內嚮者。但全國已無人能操漢語。識漢文。即緬文出版亦檢查至爲嚴重。除宗教與說部外無他書。中國則文化武力均至無以自存。此數百年宗藩關係遂一斷而永不可復續矣。今其僧徒中受印度革命黨影響。有公開運動自治者。英政府百計鎮壓之。余到仰光時聞緬僧那甲（譯音）者。因演說指斥當道被拘裁判之日。旁觀者八千餘人。定罪監禁。輿情激昂。然亦惟有目怒腹誹而已。意志不一。智識不充。能力不及。團體不立。一時刺激。五分熱心。何濟於事。有長爲奴隸以終古耳。

華僑招待

余到仰光時。仰光日報、覺民日報、緬甸晨報、國民黨青年團等。均遣代表來迓。因碼頭障闕。船自入港至泊岸中間隔七八小時。比上陸惟見陳歎生君一人。自黎明至日昃。鶴立未去。極可感也。緬甸晨報主筆鮑慧僧君介紹往永定會館。卸裝小住。董事江曉春君款待至殷勤。米商公所會員葉□□君復招邀下榻於公所中。風景旣佳。飲饌尤便。留十日間。屢擾僑胞盛宴。如前教育會會長揚子貞設筵於高解（地名譯音）別墅。其林泉之美。園藝之精。建築之雅。不讓江浙名勝。盧世明潘連璧夫婦招飲其家。座客均以國語傾談甚樂。潘固女界老名士。十年前舊識也。江鏡春君亦開家宴。歡敘宗誼。見其妻子。傅先閔君代表報界。西

餐會談。鄭□□君約在啟益公司中餐。其尤爲盛會者。則中學校長林我蔣君主席維也納大旅館之夜宴。全堂賓主百餘。僑胞各界領袖均在。并有外賓數人。升旗。張燈。結綵。奏樂。以表歡迎。酒半。林君起立致詞。介紹余演說。次請駐仰光領事陸震君演說。次請余門人林耕餘君演說。酬酢盡興。而秩序井然。是爲余在南洋第一次新式盛宴。聞亦華僑在仰光第一次新式盛宴。蓋僑民多守舊習慣。不常與西人往還。故着禮服。喫大餐。實爲僅見之事也。有蓮臺旅館者。在華人餐館中爲最大。陸領事及陳歎生君先後招飲於此。侍者皆妙齡女子。并作學生裝束。有數人眞學生。然言語舉止頗涉褻狎。有公然侍坐侑酒者。聞此間所有華人旅館無不如此。此可爲駭歎者也。

新年風味

余到仰光適值基督誕節。海上軍艦商艦均懸旗慶祝。自此日至新年一星期間。徧街市場國旗。結松枝。基督誕節之夜。賽馬場放煙火。余升屋頂遙望見之。火樹銀花。如闌元宵。新年初日。省長校閱。升炮奏樂。全城駐軍五千人會操。頗可觀。有公會堂曰 Jubilee Hall。開大賽珍會。Grand Fancy Fair。陳列英國商品暨本地產物。象牙。漆器。織物。頗佳。并有奇裝跳舞。徹夜不休。華僑遵用新曆者。亦放爆竹。燃香燭。會親友。鬪雀牌爲樂。而緬人反寂然寡歡。固由習俗各殊。抑亡國之民慘而不舒一現象也。

印度苦力

馬來羣島處處華人。苦力亦皆自閩粵來。緬甸則不然。華人僅經商不作工。而苦力皆印度人。印度人數多於華人。其生活程度又低於華人。堅苦刻厲。可佩亦復可憐。一日兩餐。惟啖大豆。米飯已爲珍品。肉味多有不知。男子一長巾。女子一圍裙。上下無他衣裳。幕天席地。沿街坐臥。起居飲食。不似人類。烏乎。五千年古文明國。三萬五千萬大民族。教主釋迦牟尼之同胞苗裔。誰實爲之。至於此極。印度種姓複雜。言語歧離。性情面貌。亦呈異象。一種豐顛削頤巖巖骨立者。多執賤役。卑意馴良。往往因營養不足而死。婦稚更憔悴無生意。一種方面大耳如彌勒像者。專兌換金錢。販賣寶石。重利盤剝。巧詐百出。善於居積。真面團團富家翁也。性好裝飾。男子恆御金珠。女子則耳環鼻環指環手釧足釧項釧。全身負戴。重如甲冑。膚理雖黑。眉目尙佳。特嗜用香水。社交未公開。女子見人羞縮掩抑。如吾國內地之閨秀。從不參與公共事業。智識程度尤低。

參觀僑學

仰光華僑學校。中學而下有育德男女學校。振乾振坤男女學校。中華學校。建德學校。平民學校。福建女學。女子公學等。皆往參觀。惜在假期。除福建女學女子公學外。皆未得見其上課。外觀惟育德爲新築。餘均賃屋。既甚簡陋。尤欠整潔。聞中華成立最早。學生最多。而校舍

似最遜。普通教育程度不及馬來半島之僑學。女界風氣更不開通。然學校往往男女並立。形式上尙無偏畸。視斐律賓僑學重男輕女。猶勝一籌。此間教育會態度消極。無甚成績可言。然較之斐律賓教育會積極把持而反阻進步者。亦勝一籌也。福建女學校長陳雯華。教員黃和容兩君。均通國語。能文章。瀕行承遠送。陳君并贈長律爲別。余依韵和之。

報館團體

仰光報館三家。雖主張不盡相同。言論時有辯難。然頗聯絡交通。有事並能協力進行。較他埠各報相互攻擊斷絕往來者。其程度高人一等矣。亦因三報總主筆同屬民黨關係。惟緬甸晨報之鮑慧僧君。覺民日報之董方城君。傾向共產主義。仰光日報之傅元闕君。傾向無政府主義。此其異耳。三君對余招待均極優渥。各報館并合開茶話會。邀余演說。又約往其共同組織之青年團演說。青年團爲此間惟一新式俱樂部。華僑各機關多蕪穢不整理。青年團雖湫隘。而凡案無塵。書報有次。且嚴禁煙酒賭博。令人耳目鼻觀一清。聞三君卽發起。人學界報界加入者已近百名云。仰光報界可特紀者。則緬甸晨報居然有女主筆事。主筆劉韵仙君。江西同鄉。隨宦長沙。師範畢業。留學燕京女子大學有年。年甫及笄。明慧果決。中西文皆能爲。急就章。思想亦極銳進。好讀印度詩人塔果爾書。嘗爲余誦飛鳥集。隻身出洋。經濟自立。與諸男子周旋共事。無羞澀態。無恐怖心。昔吾女友有名無畏者。此號可以移贈。

矣。

歡迎大會

十二月廿九日。仰光各界僑胞爲余特開聯合歡迎大會。假座華商永樂戲院。到者二三千人。教育會長曾□□君主席。余演說經閩粵兩譯。歷三小時。大抵警以緬甸亡國之前車。曷以爲國家保主權。爲民族保文化。聽者似尙能領悟。惜僑校皆已放假。故師生不能全體整隊而來。秩序不如他處大會之整齊畫一。然此間僑胞已誇爲空前盛典矣。南洋各地均無旋轉式照相機。又不善用電光放射。故大會不能攝影。華僑學校及他團體人數無過五百者。偶有之必分班攝影。余每次演說會均僅有各界代表同照之像。而無會場全體合照之像。殊憾事也。各地照相術最精者皆日本人。其次則粵人。價視內地倍昂。

工黨演說

南洋華僑惟斐律賓有工黨。正名 Chinese Labor Union。因美屬許集會自由也。傅先閣君自斐到此。亦發起工黨。但英名祇爲 Chinese Artisans and Craftman's Club。避英政府之注意與干涉也。實際上亦不能爲任何運動。余來蒙開會招請演說。聞工黨演說大會此實爲破天荒第一次。天氣炎熱。會場擁擠。聽衆駢肩而坐。接踵而立。揮汗成雨。噓氣成雲。余演說一小時許。始終靜寂無譁。演畢全體掌聲雷動。其熱誠之表現。尤勝於聯合歡迎大會。

時也。此外又蒙國民黨支部招請演說一次。因正在改組中。黨務頗爲停頓。黨員不甚踴躍。挂籍者數千。而到會者則數十耳。

游覽名勝

仰光名勝佛寺第一次則公園。動物園。賽馬場。純粹歐風矣。公園有人造湖水。可以競艇。但專爲英人行樂。華人緬人對之。有可望不可即之歎。動物園須買券而入。熱帶禽獸蟲魚。頗備。有反射鏡臺。暗室。屋頂置旋轉機。全園景物倒映几上。如著色圖畫。如活動寫真。潛水艇中。即利用光學此理。眼界與在海面無異。印度總督前曾來遊。去此不久。公園各處歡迎設備。尙未盡撤。最痛心者。華僑醜賞。特建歡迎牌坊。總督到日。各界代表站班。全城士女傾動。而軍警竟驅逐華僑。不聽近前。不令就座。當場爭執。竟開鎗傷華僑多人。至今雖與交涉。詎無結果。而歡迎牌坊尙矗立市中。此與北京克林德碑背景不同。而恥辱則一。烏乎華人。求爲奴隸不可得也。

緬印戲劇

余在英屬觀馬來戲。頗嗜好之。覺由野蠻遺風。進於文明雅化。此其過渡之迹也。來仰光。亟欲觀緬甸戲。戲不常開。又無定處。元旦之夜。特乘汽車。赴近郊九紋臺。始得見之。紀其特色數事。一。戲院蘆簾布幕。臨時搭造。如馬戲場。二。場中舞臺略高。餘則平地。藉囊加席。觀者跌

坐惟兩旁有長椅可高坐。三開演以夜。達旦乃止。名角好戲。須黎明始出臺。故觀者多攜衾枕。睡眠以待。四戲券甚廉。而跌坐之席。高坐之椅。須另買。價較昂。五夜半早歸者。可轉售其券。及坐位與人。往往得原價之太半。六樂器古樸。音調簡單。頗近中國。其戲中情節與動作亦多類似。惟演劇前後。往往須人解說。乃能始末明了。足見腳本學幼稚未進步。七緬人戲裝。男子皆尖頂峩冠。女子腰間皆有雙翅突出。獨舞合舞。頗呈美觀。聞其最著名旦角曰寶星（譯音）。如吾國之梅蘭芳。包價日逾千金。女界爲之顛倒。各埠皆有妻室。總數逾二百人。戀愛者尙不計。俗爲之謠曰。一見寶星。婦人褪裙。語意雙關。謂雖貧家不恤典衣。雖大家不恤失節也。誰謂魔力專屬陰性哉。緬甸多印度人。有印度劇。亦曾一觀。其布景分幕浸淫歐風。裝飾瑰奇。聲容激楚。尤勝歐劇。男女合演。女子亦傅粉。是亦尙白爲美也。觀者則男坐樓下。女坐樓上。女皆嚴妝。不聞聲息。掩抑錮蔽。程度介在中國與土耳其之間。是日往觀者皆印人。惟余與報界數人及劉韻仙女士同坐正廳中。羣指目之。竊竊私議。似以爲奇。其少見多怪如此。

緬人生活

緬人生活略似馬來人。衣則上衣下裳。裳卽紗籠。喜用紅紫色。男女大同。俗尙跣足。或躡拖鞋。少著襪者。上等男子上衣如吾國對衿馬褂式。下裳前幅摺疊。腰間臃腫。殊不雅觀。頭皆

岸幘如折角巾。女子則盤髻頂心。作仰盂狀。未嫁者髻旁縮髮一縷。首飾多用珠鑽。食則多用手。米飯。鹹魚。辣椒。芥末。爲常品。住則構屋如巢。覆以蕉葉。緣梯而升。席地而坐。南洋各屬習慣大抵如此。男女交際自由。婚姻手續至簡。通例多妻。僧人尤多穢行。女子毫無教育。長舌毒口。往往罵街。最奇特者。罵至忿極。則在稠衆中自褪其裙。赤裸裸向敵人。以折辱之。對方亦如此。從此便爲仇讐。終身不再交語。余親見兩婦人在戲院因爭座互詈。各掣其裙。方將脫下。經人勸阻調和。但勸阻者。非爲保全體面。惟在維持交情。意謂冤家當解不當結耳。無所謂羞惡之心也。緬人懶惰與馬來等。工作技巧者一任華人。粗賤者一任印人。笨重之事則利用馴象。余親見象數頭工作一木廠中。指揮控縱。如役牛馬然。

虎豹藥房

仰光新式資本家有聲社會間者。推胡文虎。文豹兄弟。胡氏以製藥起家。十年致富數百萬。所出八卦丹。萬金油。頭痛粉等。性質如日本之仁丹。清快丸。銷行徧南洋各屬。余來時文虎君適他去。見文豹君。操英語談話。江曉春君以友誼襄理其肆事。約往參觀虎豹大藥房。製藥工廠。及其家庭。工人數百。女多於男。皆其鄉人。肆中家中陳設奢麗。到處皆見虎豹文。或彫。或塑。或繡。或畫。乃至虎骨。虎皮。每室必備。余笑曰。胡君所缺惟一文虎章耳。江君答言。胡君重實利不重虛榮。況此等名器濫不值錢。政府雖欲假以餌僑商。計已不可復售矣。肆中

因余亦虎字。特贈虎牌藥數十種。爲紀念品。胡君年來兼營國貨商店。而歷受虧損。一仰藥房爲挹注。蓋藥房利厚。他業所不能及。其資本大部乃用之廣告費。胡於此夙所擅場。比事僂詞。語妙無比。亦其成功之一訣也。惟此等營業。欲其持久。終須煞費苦心耳。

輪步送行

緬甸本與暹羅毗隣。而由仰光至盤谷無鐵路。汽車路可以直達。故必須繞道檳榔嶼而行。余以新年一月三日動身。因懲雙美之痛苦。改乘英國公司之定期郵船。夜索批亞號。The Thonra。該公司每星期四日必有一船北上也。瀕行時。政界、學界、報界、商界到步相送者。男女數十人。行者自崖而遠。送者至崖而返。各有惘惘之意。附件有女教員三人。蔡子重君、沈紫英君、均津人。楊和林君、黔人。同舟傾談。頗不寂寞。蔡沈活潑。楊獨老成。蔡尤率真。沈則多感。年齡境遇實使之然。一日方憑欄觀海。沈忽潛然淚下。問之泣不可仰。余亦無詞可慰藉之。烏乎。憂患與智識爭高。歡愉爲哀怨之種。自由獨立。苦樂相半。況當過渡時代。女同胞尤多供社會進化之犧牲。吾輩亦壯其志而悲其遇可耳。

第七編 盤谷

車中遇友

自檳城至盤谷有直達快車。每星期兩次。早十時許自撲賴車站開行。翌晚七時可到。車中

食堂寢臺均備。余趁一月廿一日早車。午後二時許抵英暹分界處。曰拍當不撒。Padang。Pagar。有關員來檢驗行李。中暹無正式邦交。故行旅不用護照。自此北往。站名概用暹文。但分綴漢英字於下。南洋羣島鐵路一切文告均漢英並用。但在英界則英文爲主。在暹界則暹文爲主。漢文特小字旁注。以便我大多數之僑氓而已。迴顧我國政府直轄各路。反用英法文爲主。而漢文亦小字旁注。豈不異哉。五時許抵拍達龍。Padjaring。米商陳新政君來站相見。陳君民黨要人。檳城巨室。前年爲爭學校註冊事。被英政府驅逐出境。乃經營日進米廠於此。同車遇錫弗商張占本君。雖閩人而居近贛界。於吾鄉事知之特詳。傾譚甚快。又有閩商盧浩川。王書圃兩君。本不相識。忽來問訊。并出所攜拙著演講錄。具道傾嚮之意。至盤谷時。極荷周旋。不勝天涯知己之感。

湄河風景

車站與盤谷尙隔一湄河。河身約當長江之半。沿岸皆居民。尤多小商肆。門皆臨水。買物者須方舟就之。每當日落或月明時。乘小汽船溯洄上下。清風徐來。燈火浮動。景物奇絕。兩岸皆有官渡。余曾往還數次。日中熱不可當。惟初到時。趁盧浩川君公司汽船夜行十里。最爲俊遊。渡畢復承盧君介紹。小住華商三月俱樂部。地極清曠。起居飲食均佳。惜離華僑區域過遠。翌日蒙潮幫商人招待。移寓潮州別墅之培英學校。校董曾澤如君。校長侯錦堂君。均

殷勤可感。侯直隸人。畢業燕京大學。同事者尙有三五北人。言談頗不寂寞。

立國現狀

暹羅本我國藩屬。余兒時在京尙及見象房中暹羅進貢之白象。前王見中華聲威之廢墜。安南、緬甸之滅亡。變法維新。宣布獨立。派子弟及親貴赴歐美各國留學。回朝即掌各部政事。兼聘英、美、法顧問。三十年來。成績粲然。歐戰時加入協約國。資遣飛機隊。收回治外法權。出席和平會議。居然日本第二。國際地位遠駕吾人而上之。今王曾畢業英倫大學。著書多種。有名於世。兄弟數十人。分領各要職。有諮議院而無國會。純然君主獨裁貴族專政之制。但民智幼稚。上下相安。交通、教育、實業。均由政府主持經營。爲有系統的進步。從此做去。更二三十年。斷然爲東方一文明富強之國。內政既無劇變。外交又得均衡。國小民愚。自然易治。蓋此中亦有天幸存焉。

華人血胤

百餘年前暹羅被侵於緬甸。首都淪陷。全國騷然。潮州人鄭昭者。率軍破敵。南北轉戰。內外救平。暹人擁戴爲王。耄期倦勤。其子壻暹人。誣以癡狂。弑之而篡其位。是爲今朝創業之主。五傳而至前王。脫中國而獨立。六傳而逮今王。務養成國民性。但崇尙歐風。鄙夷華夏。著英文書名。東方猶太。詆斥華人。不留餘地。國民心理大爲轉移。對我感情日趨涼薄。其實今王

固中國之外孫。王弟松克拉親王 H. R. I. Prince of Sangkha 母后且爲華婦。今其貴族官吏中華人血統殆十分之八。而盤谷一城純粹華人亦占居民之半數。大抵工商業皆純粹華人。官吏軍人名暹人而實多華人。惟農民乃純粹暹人。然大地主仍多華人。徒以國威不揚。教育不昌。華人已自忘其本來。甚者反噓同類以示異。此其可痛百倍於外族之憑陵矣。

王室趣聞

暹羅王室以爲龍種矜貴。不可外傳。歷代皆同輩自爲婚媾。又實行多妻。故諸姊妹悉充王下陳。有姿首者。無得幸免。與日本古禮俗略同。今王醉心新文化。毅然欲廢此舊制。而伯叔兄弟均不謂然。尤有王妹數人。冀邀天眷。正位中宮。百計尼之。王不得已。虛元后之位。但自由戀愛。冊爲妃嬪。惟既夙主張一夫一妻。不便廣立內寵。於是每一年或數月。輒離婚一次。聞五年以來。已易妃十二人。王妹格於成例。不敢下嫁。守貞待老。或獻身社會事業。遣此華年。情至可憫。余親見數人。一爲女學校長。一爲醫院看護婦。一爲其叔父某總長書記。皆近三十。雖不能決其無面首之奉。然家庭幸福則此生已矣。

暹人特色

暹羅人畢竟不脫小國民氣度。喜夸大。尙裝飾。徽章數十種。種各數十級。無處不見金碧輝

煌之佩帶。帽章、肩章、領章、袖章之外。更有揭之袋中。綴之胸前。繫之鉛筆。或時表。尤普通者。爲鈕扣徽章。其衣服則上身常用白色綢布。西法裁製。下身除軍警著袴外。無論男女老幼。貴賤。悉穿紗籠。普通藍色絲質。其結束法與馬來緬甸不同。前面摺疊數重。更由胯下折而插之後腰。如騎馬式。顏色最爲講求。紅、黃、紫、綠、橙、灰、黑七種。自星期起。按日配分。周而復始。上等人一律仿行。故每人至少須備紗籠七條。從前飲食用手。居住席地。今漸改從歐風。見人行禮仍多依舊式。合掌致敬。余參觀各校時。學生皆不起立。但避席向右低首合掌。亦彬彬可觀也。暹俗頗異者。則向來女子皆剪髮。今三十以上婦人無一不短髮四被。如劉海式。新式始以蓄髮爲美觀。與中國及西方風氣正相反。

佛寺大觀

暹羅爲中印文化之會合處。但印度宗教風俗漸染尤深而且久。定佛教爲國教。男子皆須爲僧。與緬甸同。佛寺建築似較緬甸尤爲盛麗莊嚴。佛皆金身。飾以珠鑽。殿宇內外。雕刻之精。嵌鏤之巧。奪造化而通神明。直非常人思議所可及。尤非文字描摩所能盡。余曾參觀者。有薩答迭寺 *Wat Sakate*。號稱最古。建壘爲山盤旋而上。全城在望。有拉難達寺 *Wat Lanna*。殿中木梯高達塔頂。頗苦攀躋。有鄭王寺。有禪寺。 *Wat Chang*。皆暹人爲鄭昭紀念而作。有三寶宮。乃華僑爲鄭和紀念而作。有破特寺 *Wat Pote*。臥佛一尊長七十步。三寶

宮禪寺皆在湄河對岸。禪寺地址爲鄭昭克敵班師駐紮之處。其工程似爲各寺之冠。寶塔五六座。皆用名瓷碎鑿。砌成仙佛像。及各種花紋。鈎心鬪角。眩精盪魂。較之摩色玻璃。尤爲神乎其技。塔皆矗出雲表。石梯上更繼以鐵梯。有賈勇者。緣附而升。比達極巔。自下視之。小如飛鳥。其高度可以想見。此等工程。真不知當時如何着手。聞建築者皆爲華人。其雕刻塑像。多與內地相似。翁仲獅象。彷彿南京明陵前物。三寶宮。今尙由華僑管理。每年迎神賽會。醮資演劇甚盛。

君民同樂

暹羅雖爲君主獨裁。然自變法以來。採用開明專制。國王又浸染歐化。擅演說。好遊行。臣民亦得常遂瞻依。每年例於冬季大酺十日。開放禁苑。陳列歷代寶器及內國物產。皇族貴族婦女奔走執事其間。夜則奏暹洋音樂。或跳舞。或演劇。其入場券及售品各價。悉充擴張國防之用。余到盤谷。適逢其盛。曾兩度游觀。國王偕其愛妃臨幸。并自爲詩歌。廣徵廣和。又展覽其游歷所攝各國人物風景相片。各部大臣及夫人侍從如雲。衣裙繡縵。履屣交錯。奉觴上壽。萬衆山呼。儼然承平氣象。余遇見教育局長。御前太醫。禁衛軍官等數人。相貌皆我族類。問之亦自承爲華人子孫。并有能操潮州語者。惟與談中國事。則不知有漢。遑論魏晉。彷彿漁父之入桃源也。

飛機工廠

暹王盡力國防。海陸軍均頗可觀。尤獎勵飛機事業。於首都近郊冬忙站 Don Muang 設大製造場。已成飛機千餘架。一月十三日。政府特備專車。請各國外交官及新聞記者往觀。臣民亦得購票而入。余辱招待。參與盛典。車行約四十五分鐘。可到沿途升旗結綵。張貼飛機影片。并附簡單說明書。別有英法暹文特刊。敘述飛機之功用及成績。喚起國民之注意。與同情。來賓各贈一冊。場中分十餘部。有金工、木工、縫工、機械等科。工師悉用暹人。材料亦取暹產。外人觀者嘖嘖稱道之。午後四時。以茶點款待外賓。侍者皆軍裝。禮儀頗隆重。五時試演飛機。來賓得請願同乘。大小五百餘架。先後飛翔空中。或比翼偕行。或銜尾遞進。或散天花雨。或翻筋斗雲。或挾電光疾揮成字。或放煙火倒射如虹。其尤切實用者。則轉運郵包。拋擲炸彈。而最稱妙技者。則機不停而人可上下。并可援引地上行人。七時許散會。仍乘專車而歸。聞國王今年擬徵特稅。加製飛機。故有此宣傳作用。信而後勞其民。雖重征之。無怨讟者。王可謂知治體哉。

盤谷街市

盤谷瀕湄河。擅天然風景。全市居民約五十萬。馳道四達。電車、汽車、馬車、牛車、人力車、交通便利。市面多新建築。平均二三層樓。折衷中西程式。城中有模範馬路。約長十英里。砥平矢

直。刮垢磨光。路分七格。中間專駛汽車馬車。左右花木成行。綠蔭如幄。爲人行徑。沿途皆設坐椅。更左更右專駛牛車人力車。再左再右近屋宇處。敷以花氈。亦爲人行徑。中間橋梁。除兩旁便道。容汽車八乘往還。入夜電燈光明如晝。余敢斷言。中國雖租界無此大觀。北京新華宮外一條直可憐殺人。聞華僑言。此等建設不過三十年來事。今不特盤谷如此。全國鐵路所通。皆有馬路以輔翼之。汽車縱橫。游行自在。余嘗於月夜偕友人乘汽車繞都城。疾馳三小時。無處不見電燈掩映官樹交叉也。王宮有新舊兩所。在模範馬路之兩端。舊宮有禁城。神似莫斯科之克列母林。Kremlin。宗廟及佛寺均近在宮側。曾得一瞻仰。新宮純粹歐風。諮議院附設其中。圓頂矗立。如華盛頓國會式。官衙均萃集一處。國家醫院。動植物園。圖書館。博物館亦距離匪遠。蓋模範馬路者。新盤谷之中心也。

國立學校

暹羅新教育發達。學校皆官立。小學頗普及。高等教育則惟盤谷有之。大學甫成立七年。分醫。工。農。商。文。法。等科。醫科最大最備。則美富翁羅克發洛贊佐之力也。大學各科皆在都城。惟醫科在湄河對岸。余由教育總長介紹。得一一參觀之。并參觀師範學校。工業學校。美術學校。貴族女學。模範中學。模範小學。等處。大學有學生四百餘人。教授多外國人。管理員則多親貴留學畢業者。師範學校專設初級。男女分班。工業學校。美術學校趨重實用。出品甚

夥。各有學生三四百人。貴族女學音、樂、手工、成績特佳。校長爲今王胞妹。承召學生唱國歌。奏遷樂。表示歡迎。模範中學小學均聘外人主持。管理教授恪遵程式。統計報告尤極精嚴。教育部派員稽查至爲周密。一切表冊悉合科學制度。各校多不收學費。惟收宿膳費。宿舍部署整潔宜人。普通教育小學六年。中學三年。女學少一年。十二歲以上男女不同學。大學尙無女生。其建築均尙質樸。惟大學禮堂仿古佛殿式。醫科講堂仿美石室式。費頗不貲。大學基地曠漠。今占用不及十分之一。餘皆賃人耕種爲田園。收其地租。補充經費。博物館不甚大。華人骨董甚多。有鄭王長生祿位牌。圖書館分新舊兩部。舊籍多梵文寫本。書廚雕飾絕精。多出華人手製。館長爲法人。并聘用華人印人。漢籍有大清會典、圖書集成等。蓋勝代之賜書也。

親王宴會

暹京大學校長爲今王御弟松克拉親王。年三十以來。曾留德國研究醫學。又游歷英、法、美國多年。各國語皆純熟。余參觀時。親臨鄉導。并約往私邸午宴。王妃亦出見同餐。二十許麗人也。自言未婚時赴美留學。肄業卜技利城。與長女兆菊先後同學。英語流利。居常西裝。新舉王子。甫彌月也。王邸極宮室之美。擅園林之勝。陳設均舶來品。飲饌則東西相參。烹調別有風味。席間談及中國時事。王問吾政見如何。余略陳新國家主義、新民主主義、新社會主

義各條。王極口讚許。舉杯祝余。早得政權。實行政見。妃笑謂曰。俟君組織政府時。余當爲不速之客。訪長女公子。話嘉州風景。王曰。此非戲談。來年擬乞假赴貴國一游。參觀協和醫院。并調查醫學及公共衛生事業。妃當偕行。請爲東道。余念邦家之不造。感身世之無依。來日大難。前途如漆。直不知何以置對。瀕行復承贈紀念品。牙杖銀盒數事。并留余小住。將介余朝王。余深感謝之。

華僑教育

暹地華僑向無教育。民國成立後。始有新式學校。因鄭王關係。潮屬人最多。故所辦培英學校最大。兩等小學學生四百餘人。更有潮州女學。學生亦二百餘人。此外則瓊州人所辦之育民學校。客屬人所辦之進德學校。廣州人所辦之明德學校。閩南人所辦之培元學校。學生多者二百餘人。少者五六十人。皆小學程度。除培元外。各校均附設會館廟宇中。但新築壯麗可觀。惜多無運動場。粵人尚有明德女學。現因風潮停課。中學則惟有美國教會代辦之盤谷中學。分中暹兩部。各屬學生四百餘人。又存真女學。亦美教會代辦。粵屬學生百餘人。各校教員。除本屬人。兼聘外省人。潮州女學。蘇人王湧德女士。湘人劉□□女士。曾在南京聽余講學。盤谷中學。及培英。則多燕京大學畢業生。又有韓秀華君。本天津水師學生。服務軍艦有年。翩然捨去。漫遊南洋。專授國語。英荷屬弟子無算。此間各界亦多從遊。文化宣

傳其功非淺尠也。有暹產女生黃妙輝君。潮州女學畢業。今任教員。國語流利。不知者以爲北方佳人。補習教育則有湄南夜學。曾開會請余演說。

教育苛例

暹政府務自養成一特殊國民性。故對華僑教育取締至爲煩苛。條例疊出而不已。其尤甚者。則非入暹籍不得任校長。非通暹文不得充教員。每六個月考試暹文一次。不及格者展期半年。再落第者停止職業。學生每期每週至少須讀暹文三小時。暹文不及格不得畢業。逐月報告。臨時稽查。不如程者。勒令停辦。開學放學。進退員司。應先呈請核准而後實行。聞今更擬新例。華人非居留五年。年逾四十。不得教學。此案通過。則僑校皆將閉門。教員皆將回國矣。吁可畏哉。他屬所未有也。國際關係既未成立。僑界又各幫分裂。無大團體總機關。人爲刀俎。我爲魚肉。僑校一縷生命。乃常在哀號宛轉之中。內地同胞對此作何感想。

華僑事業

盤谷有華字報紙三家。華暹新報成立最早。總理蕭佛成君。有聲社會間。惜回廣州。未及一見。僑聲報總理譚振三君。兼綰銀行。曾蒙招飲。中華民報總理溫德餘君。亦得晤談。均屬民黨。而意見各殊。華僑富豪概屬米商。米廠十數家。工人各數百輩。次則布商。潮人陳欣木君。自立染布廠。購新式機器。聘中外工師。氣魄甚大。其新夫人唐靜媛君。今肄業上海愛國女

學。黃任之君游暹時。陳君招待至優。余來亦備蒙盛款。又瓊人雲竹亭君。爲前浙江實業廳長。雲韶君族弟。徧遊歐美。富新智識。獨辦製冰廠。爲此間專利事業。商會會長廖葆珊君。業燕窩。年七十餘。暹前王贈以榮銜。既富且貴。侈然以老勳爵自居矣。

聯合歡迎

留盤谷時。隨緣說法多次。其聯合歡迎公開演講。則在一月十八日。卽假座培英學校之大禮堂。到者各校師生爲多。共計五六百人。沈閣英君爲譯閩語。會畢復開公宴。惜有他約。未及久談。在暹華僑無集會結社之習慣。故聽衆人數視他埠爲減色。而在盤谷已爲盛會。無雙。華僑招飲者數起。多在海天酒樓及錦珍酒樓。皆粵人營業。例召歌妓侑酒。謂之開廳。費數百金以爲常。酣嬉淋漓。不知有亡國破家之事也。某君席上有兩西人。共擁一姬。醜態百出。余極不耐。酒半輿辭。而主人猶以爲若輩不善娛賓。使圍繞而遮留之。眞惡作劇也。

暹羅舊劇

余百忙中。僥人借往戲院一觀。暹羅舊劇。大體與緬甸劇相近。男女裝束差別甚微。頭戴峩冠。金飾如寺觀之塔尖。坐皆席地。惟君后得據胡床。進退轉折均用手足表情。有似俄國之跳舞。所演多歷史上英雄兒女故事。同觀者有潮州女學教員通暹語者。爲之解釋。略知梗概。暹羅亦有新劇。一切模倣歐風。音樂全用西器。國王嘗自編腳本。親自登臺。每年恆有一

兩次。亦與民同樂之意。惜余未及一見。華僑戲院數家。有廣州班、潮州班。并有上海髦兒戲。不知是何牛鬼蛇神也。

多蟲之國

南洋各屬開闢已久。近城市處不見毒蟲猛獸。并蠱、蠅、蚤、蝨亦絕無而僅有焉。床皆施帳。幾等虛設。惟暹羅則不然。余在盤谷。見高樓新築。滿壁伏守宮。有長至尺許。遇交尾時。作聲啾啾然。燈用罩數重。下懸紗斗。蛾子死其中者。每夜積如粟米。蠅不甚多。蟲則白晝噬人。其餘各色甲蟲、爬蟲、飛蟲、奇形異狀。不可殫述。就寢時必重帷深下。乃敢安眠。真苦事也。西人及此間貴族邸第。牆皆衣錦。門皆障紗。非徒美觀。取資屏衛。聞年來蝗災甚劇。農科、醫科大學。協籌救濟之策。歲糜國帑無算。

登舟送別

暹羅爲東方一新興國。其政教風俗及獨立進步之迹。極有價值。耐人參詳。惜郵船赴西貢者。每半月始一開行。一月十八日晚八時。匆猝趁輪遂去。留盤谷纔一週耳。是夜月色頗佳。步頭送別者男女各界數十人。尤有數人同乘小舟。橫渡湄河。比登大船。尙散步談心。直至斗轉參橫而後別。蓋夜過半始解纜也。船名毛利斯郎。S. S. Manillee Tong 屬法公司。容積匪大。又逆貿易風而行。三晝夜間。顛簸如篩糠。大浪撼舵。似山崩地裂。余雖不暈吐。而

眠食亦爲失常。蓋歷渡重洋。從未經此震盪也。航海豈易事哉。

第八編 西貢

法領分界

法領印度支那分爲五屬。曰東京。曰安南。曰東蒲寨。曰老撾。均爲間接保護國。東京有官僚內閣。安南東蒲寨皆有王。一駐海防。一駐蓬片。老撾有王。又有佛教大主教。其上各置駐防長官。Resident 以監督之。曰交趾支那。爲直接殖民地。置省長。Governor 駐西貢。而河內有總督府。Governor-General 綜攬五屬大權。東京安南本爲一國。緣內訌分裂。法人因仍不變。其政體風俗完全漢化。向用中文。并讀儒籍。取士設官。一切仿天朝制度。今安南王尙服冕旒龍袞。東京官僚尙朝衣朝冠。玉帶。東蒲寨及老撾奉佛教。襲印度文化。人種言語亦與緬甸暹羅爲近。惟山中有漢族數千人。爲吳三桂舊部子孫。自爲風氣。舊歷元旦。必焚香朝拜吳大將軍像。并用漢語賀年。交趾支那亦染華風。多解粵語。面貌服飾雅似南人。自內地來遊者。幾不辨爲外國異族也。

西貢大畧

西貢爲法領印度支那交通孔道。又爲交趾支那之首都。法船往來歐亞者。及華人往來雲南者。必出其途。埠在西貢河口。河身修而且廣。又委宛曲折。船行六小時而後達。港口風景

絕佳。商業頗盛。官衙及公共建築皆在焉。附近有地名曰涉命。Cholon 粵語譯爲堤岸。而潮語譯爲宅郡。乃華商麇集處。火車、電車、汽車、馬車、人力車皆可到。沿途人家櫛比。兩城漸合爲一。路政視英屬羣島略遜。雖城鎮鄉村交通便利。而道面頗狹。橋梁尙多架木爲之。車行不免顛頓。有民黨舊人張化臣君。招乘汽車郊遊一日。往返百餘里。每數里輒見一市場。衣食原料悉備。營業多半華人。四郊水田稻苗正盛。農家力作。男婦戴大笠如傘。夏畦盼盼不休。西貢米爲出口唯一大宗。誠哉其粒粒皆辛苦也。

上岸情形

西貢上岸最難。華人尤受虐待。十五年前。歐遊時乘法國郵船。過此曾一登陸。由船長發給人情紙。移民局簽字。即可放行。然此惟過境則然。若人口則手續苛細異常。人多聞風而卻步。余自盤谷首途。蒙潮州會館首事專電。此間潮屬大米商郭肇智君。屬來接船照料。滿擬可以順利無阻。豈知郭君膽小如鼷。談虎色變。聞余爲社會黨人。恐法政府注意及之。將以招待而被株連。屆時避面不來。并不敢發表此電。冀免交通聲氣之嫌。其用心亦良苦矣。船抵岸時。見西人搭客陸續皆去。惟余一人。雖示以法領簽字正式護照。仍留不放行。移民局員來者爲安南人。與之語。置不理。幸未幾復來一法人。余用法語自陳。承導往岸上局中。見一長官。據高座。甚威嚴。三五語後。容色頓霽。又導見移民局長。一見握手如平生歡。并言夙

聞君爲社會名人。本局決無留難之理。向例華人入口須覓舖保。納身稅。印指模。今一切豁免。請留護照爲質。當別給人情紙。可恣游十五日。倘未鑿者。仍得展限。余大喜過望。鄭重聲謝而出。行李亦蒙優待。不加檢驗。一併放行。移民局一華員告余曰。華人入口未印指模者。前有孫中山。汪精衛。今與君三人而已。烏乎。指模本專爲慮囚之用。今華人上等旅客。乃以倖免爲異數。豈不痛哉。豈不痛哉。

移民局規

移民局儼然中國舊式官衙。華人執役有如胥吏。魚肉同胞。事所常聞。有往返數十次。守候數十日。連累數十人。而不能得一人情紙者。蓋辦事之遲速。以納賄之多寡爲轉移也。門口有分房六處。曰廣州幫。曰潮州幫。曰瓊州幫。曰客幫。曰福建幫。曰佛回教徒。即印度土耳其人。各幫有幫長。爲承轉機關。一切公事。先經其手。除特別人情紙外。每人入口稅五元。每年再納身稅三十元。婦女兒童減成。納稅過三十年。年在六十歲以上。境遇寒苦者。得呈請豁免。納稅不足額。或不如期者。驅逐出境。每人給與憑照一紙。相片指模悉備。隨身攜帶。否則處罰。移民局之收入恃此。其餘營業稅歸市政廳。違警罰歸警察廳。訴訟費歸審判廳。不在此限。

華僑苛遇

人頭稅外。華商須更逐年納營業稅。共分十等。第一等無定額。五千元至數萬元。第二等四千元。至第九等二十元爲最低。雖負販者不得免焉。然此猶其有制者也。別有違警罰。警吏沿門巡視。入屋搜查。吹毛求疵。無孔不入。或以妨害衛生。或以阻礙交通。或以私藏禁品。或以忘帶憑照。每次科罰多則百元。少則數角。聞常年平均華人違警罰款百二十萬元以上。警吏中飽不計。此可驚也。華人無言論出版集會自由。與土人同。安南僅一華僑日報。其總理尙用法人。每日編輯各稿。須先送總理閱過簽字。再送警廳閱過簽字。往往擱置不下。新聞論說悉爲過日黃花。有中西各報喧傳證實之事。稍與法政府有關。輒用朱筆勾勒。不准轉載。學校進退教職員。採用教科書。須先請政府核准。除婚喪酒食外。聚衆十五人以上。須先請政府備案。有內地華僑聯合會代表徵求會員。汕頭某學校校長籌募捐款。先後被拘監禁。期滿驅逐出境。入會者。籌捐者。分別科罰。以故華僑人人自危。虎尾春冰。朝不保夕。如郭肇智者。可笑亦復可憐也。惟挾妓吸煙賭博械鬪。及一切不道德不名譽事。則可明目張膽。橫行無禁。故華僑交口歌頌法政府寬大。烏乎噫嘻。

越人苦況

安南亡國之慘。具見吾友巢南子自述痛史。語曰。哀莫大於心死。余兩經西貢。見其人民道德墜落。智識愚闇。性情偷惰。而益歎法人亡國之術之巧。而越人光復之業之難。東京距我

近被化久。尙不乏抱革命思想之人。聞近月有揭竿起事者。一夫夜呼。四方響應。法人勞師動衆。僅乃克之。報紙禁載。不知其詳也。安南交趾。則夜氣沈沈。女性纖纖。幾於絕望。其男子謀充奴隸。而不可必得。其女子一侍巾櫛。則引爲殊榮。法人直犬馬畜之。越人見法人不得坐。并不得立。鞠躬而進。膝地而行。軍官市中上下馬時。恆令越人伏地袒背。爲承足之石。法人號稱基督教徒。文明民族。揭藥一夫一妻制。而在越者。無不廣蓄妾媵。或間月更換。或按日輪值。或聚衆宣淫。習爲常事。并徵婦女爲官妓。供法軍人獸慾之用。春風一度。代價三角。有需索者。得逮捕之。淫亂成風。廉恥道喪。無節操與愛情之可言。全國無出版機關。不准自立學校。不准用漢字與越字。一切以法文拼土語。愚民政策。至於此極。烏乎。法固共和先進國。自由平等博愛諸名詞。蓋白人自用之專利品耳。他種民族。曾何涉焉。

華工近狀

歐戰前西貢華僑皆前列五幫人。廣州幫特盛。今則外江人日加。內有北五省華工數千。返自巴黎。留滯於此。外江人既未自立會館。於是附屬於客幫。故客幫今爲最大。華工多好勇鬪狠。懸不畏死。越人最憚之。法人亦不敢無理折辱之。其野蠻可羞。其勇氣固可用。惜用之不得其道。包娼庇賭。殺人放火。無所不爲。又有湖北天門人。男子沿街行乞。女子則賣武藝。自活并足贍其家人。別有歌妓數千。均隸粵籍。華僑無充苦工者。但生活多不豐裕耳。越人

骨格面貌酷肖粵人。故雜婚不呈任何變象。華婦來者亦不絕。黑衣赤足。裝束相同。惟華婦短衣。越婦長衣。其差別僅此。

參觀學校

此間華僑學校亦分五幫。多在堤岸即宅郡。廣州幫穗城學校。民國元年成立。現有學生四百餘人。建築崇閎。部署整潔。最爲可觀。潮州幫義安學校。客幫崇正學校。同在一處。而分別授課。學生各百餘人。福建幫閩漳學校。學生亦百餘人。今改福建學校。校舍新落成。其舊校舍則讓與廣州幫之坤德女學。乃此間唯一之女子公學校。校長教員似頗開通。學生亦近百人。此外尚有各縣自立之學校三四處。規模均不甚大。又西貢市有華僑學校。灌文女學。未得參觀。以上均兩等小學程度。華僑倡議自立中學。而法政府不許。因已有代辦之中法學校。學生皆中學程度。約二百人。注重法文。兼授漢文。校舍在西貢堤岸之間。空氣風景。建築設備均佳。惜教授管理不盡合新制。法政府特設華人視學官。以新會老茂才蘇壽康者任之。每星期巡察各校一次。有考試教員之權。各校咸呼爲大宗師。又精武體育會。因呈請立案不得。改稱精武體育學校。專授國技。分男子、女子、兒童三部。學生共二百人。

商會演說

西貢堤岸華僑各界聯合歡迎。請余演說。假座商會新會場。建築之壯觀。部署之適用。爲南

洋各屬第一。落成未匝月也。到者學校教職員、會館團體各代表。共五百餘人。學生因未開學不能全到。聞自商會成立以來。且自民國成立以來。此爲第一次大會矣。僑界公共事業之不發達。集會結社之不自由。可想見也。會場中巧遇老友華林君、俞頌華君。自歐回國過此。因得暢敘離襟。華君留法。俞君留德。皆多年。據所見聞及其感想。均謂改造中國不可無強固之組織與領袖之人才。華君述里昂大學及勤工儉學近狀。切慨青年品性之墜落。教育方法之不良。俞君新游意大利。以爲慕沙利尼之治績。實與列寧、託洛斯豈殊途而同歸。余皆深有味乎其言。蓋無論何種政見。必賴集中統一之機關以推行。中外古今固無二理。中國今日苦乏實力養成重心。凡百主張都成虛語。經生寡術。言之赧然。

工會歡迎

西貢堤岸華僑工人亦有團體。但注冊時均假名商業俱樂部。有博愛公會、勵羣公會、歡迎茶話。到者各七八十人。皆洋貨雜貨店傭地位。介在工商之間。智識不高。而感情至厚。勵羣并假座永樂酒樓。開廳大宴。會員齊集。此間習尚。非多數歌伎侑酒不足示敬於嘉賓。且張筵均夜半。而酒闌人散。必至參橫斗轉之時。公會沿此俗例。召琵琶仔十餘人。絲竹肉聲一時并作。余極不謂然。正色告誡之。十一時半。略用茶點即去。翌日貽書切責。略謂個人狎妓。余可不問。惟以團體名義。且由工人組織。固宜矯正舊習慣。表示新精神。如此行爲。殊失所

望。不知當事者能受盡言否耳。

國民黨會

南洋各屬嚮爲中國革命策源地。亦同盟會國民黨發祥地也。自孫中山失敗後。英法政府對國民黨嚴重取締。有多處已禁止開會。并不准掛牌。西貢其一也。當余來時。黨員非正式招請茶會談話。黨部僅小樓一間。門揭商店字號。是日到會者四五十人。據稱已遣代表前赴廣州。參與改組之議。并請中山電法交涉取消禁例。因詢問余對於改組之意見。及預測向法交涉結果如何。余謂國民黨太無統系。改組爲必不可緩之事。但既採共產傾向。自不能得各資本國之同情。故交涉必無成功。前途更多阻力。可以斷言。然果事所當爲。豈能曲徇外人之意。特改造事業必須純出自動。又須適合國情。太阿倒持。邯鄲學步。是當戒耳。他何慮哉。座中諸君似頗領悟。不知國內同志以爲何如。

游觀小記

西貢市中可遊觀者。惟動植物園。及模範戲院兩處。戲院惜未開演。徒觀其建築之嵯峨。公園結構與上海法租界公園相似。惟動植物及陳列品種類甚備。虎豹犀象均馴服。知人意。并能演雜劇。彷彿入馬戲場。余特注意安南舊劇。蒙羅春君招請往觀。門首署正倫戲院四字。座位布景已大加改良。扮演戲文全仿中國式。樂器音節亦大同而小異。其特色則閉幕

時奏樂者歌小調博笑。觀者頗不寂寞。是夕正戲爲金山寺。坤伶二人。飾青蛇白蛇。態度夭矯。大有妖意。唱白不知作何語。情節則歷歷相符。了了可辨。左右門簾亦有出將入相字樣。烏乎。中國文化今尙存者。止此而已。歸寓感愴。不能成寐。羅君生東蒲塞。畢業中法學校。留巴黎習飛機。國學有門徑。國語亦暢達。一不可多得之人才也。張化臣君約同郊遊時。車過平交里故里。正阮文懷家。觀所製水力風扇及發音機。機能奏樂十二闋。巧不可階。游西貢者多往觀。并留刺或題名爲紀念。

新海陽船

余留西貢僅五日。欲赴斐律賓而無船直放。不得已繞道香港而行。有新海陽號。那威國籍。華商租用。往來西貢香港間。一月二十七日午後啟程。余購超等票。同乘者僅銀行家劉君夫人及一婢子。夫人周氏。年二十許。本上海女學出身。故吐屬風雅。舉止大方。無小家兒女態。途中三晝夜。風浪洶湧不止。夫人及婢子均偃臥嘔吐呻吟。全艙惟余一人。悶極。上瞭望台。與船主攀談。船主及船員均那威人。居中國垂三十年。以爲華人世界最堅苦馴良之民族也。絕大缺憾。惟在知小己而不知大羣。故其能力終於有限。甚且互鬩。相銷無餘。卒之羣危。已亦莫保。所謂皮之不存毛將焉附。亦老先生常談耳。而出自外人之口。彌覺其動魄而驚心也。船抵香港大霧。停不得入者半日。與劉夫人談。知亦關懷時事。非唯秀外。抑且慧中。

特錦屏人嬌慣性成。恐終不知亡國恨爲何等耳。

第九編 馬尼拉

上岸情形

由香港至馬尼拉。Manila 趁提督公司船。Admiral Oriental Line 三十六小時可到。頭等價七十五元。設備待遇一切如歐美大旅館。乘客不自知其在海中也。唯上岸困難異常。對華人尤極嚴重。有美領簽字護照。船醫種痘執照。尙須由移民局詢問口供。記錄比較。是否相符。行李則須俟次日自向稅關請驗。傾囊倒篋。洪纖不遺。乃至衣袋書函。逐一啟封檢視。有時以巨鐵鉗插入箱底。其鑰鑰不易遽開。則斬以斧斤。聞華人確常有挾帶鴉片嗎啡之事。惟關員藉口盡職。任意誅求。存心破壞。情殊可惡。余生平過都越國。斐律濱實爲第一難關。是日幸有總領事館秘書。教育會及工黨代表到岸招呼。否則恐更費周折矣。

工黨招待

余在西貢晤老友華林君。承介紹於斐律賓華僑工黨總理楊寶璜君。蓋華君留斐有年。工黨卽其所發起也。楊君偕桂華山、侯昌閣諸君。以汽車迓往馬尼拉市中心衣斯可達街。Hotel Manila 之密嫩旅館。Hotel Manila 管理純爲斐人。部署頗見經濟。此亦斐人商業發達之一證。惜三餐洋食。余頗不慣。翌日移寓利札街 Avenue Rizal 之廣東酒樓。工黨諸君招

往其事務所參觀。并盛筵相款。又訂日開會歡迎。請爲演說。各國勞動運動及派別。楊君傳譯。頗能委曲詳盡。楊君閩人。系出世家。肄業聖約翰大學。有年。國語英語均極純熟。現經營一煙廠。有男女工人百餘。工黨成立已四年。初時頗有成績。近因人才消乏。經濟空虛。辦事不如前之猛進。余特書到底不懈四字贈之。

教育會長

教育會會長陳迎來。商會會長李清泉。均閩南大資本家。陳以製酒起家。不識國文國語。又不通英語。覲面竟不能通詞。其姓名均用西班牙字。曰 *Banca*。子女直不自認爲華人。而居然爲華僑教育會會長。并連任十年。可謂大奇特奇。李君歐戰時暴富。現爲中興銀行總理。亦不識國文國語。但能以英語談話。余本有介紹書數件。而兩君不知禮數。傲然以大資本家面孔向人。余痛斥之。嗣經律師薛敏洛君居間調和。兩君乃折柬招邀。前倨後恭。態度頓異。顧余終以陳君之地位與行事非宜。力勸其避路讓賢。庶幾斐島僑學有根本改革之望。語曰。惟善人能受盡言。又曰。春秋責備賢者。余以善人賢者待陳君。不知陳君果不辜余期許否耳。

學務怪象

以目不識丁之人長教育。盤踞把持十年。生平未嘗一參觀學校。一接晤教職員與學生。有

事則召見校長。示以意旨。而使奉行之。奉行不謹。則絕其生計。而易以私人。如此而欲求教育事業之發達。是航斷港絕流而斬至於海也。最奇者。非商人不能爲教育會會員。投票權數則以財產收入爲比例。御牛車者。年納稅四元。亦可取得會員資格。而校長教職員。雖請願報効年四十元。亦屏不聽入。此真古今中外未有之珍聞也。此間教育會會員。悉視教育爲奢侈品。教職員爲店傭。廠工用英文直稱之曰勞動者。Tubber 所得曰工價。Wage 其於尊師重道之說相遠去矣。某富商囑余請一高師畢業女生。來爲家庭教師。月薪止出三十元。而彼所用斐女侍者。則月薪尙需四十元也。烏乎。吾爲僑學前途一哭。所最難堪者。此教育會直轄下六校之學生耳。

參觀僑學

馬尼拉僑學最高者爲華僑中學。校長周行健君。東南大學畢業。籍贛之廣豐。與余爲隣縣。時方出游外埠。余瀕行日始一見之。教授無錫人錢抱器君。代表全校歡迎參觀。并開茶話會。學生僅四十人。女生四人。三人爲馬玉山君女公子。最大者有普智學校。日夜兩班。學生共五六百人。最久者有中西學校。現分爲二。第一校成立已二十有六年。其餘愛國學校。閩商學校。華僑公學。各有學生百餘人。以上六校皆隸教育會直轄下。華僑公學成立最後。主持者皆工黨人。與教育會因請費事爭執多年。經斐政府居間。始取得津貼一部。各校學生

多聞人學課分上午下午。國文英文各半日。班次分配亦不同。國文除中學愛國外。均用國語教授。校中有少數粵人。別處一堂。中分數級。種種不便。外有粵僑公學。尙嫻女學。則粵人自立學生各五十餘人。女學祇此一處。且與他校絕不交通。尙有聖公會女學。學生近二百人。美人主持。用英語。無省界。各校共同缺點最顯著者四事。一不用國語。二不練體操。三不習手工。四課目太繁。時間太長。每日中西文共六七堂。每堂繼續一點半鐘。星期六日亦不放假。小學如此。誠虐政也。

公開演說

留斐兩週間。對華僑團體曾演說數次。一在工黨。一在青年會。一在華僑中學。一在惠北兵災籌賑會。其各界聯合公開大會。則訂期二月十日星期下午。假座普智學校大禮堂舉行。發起者爲教育會直轄六校。并普智書報社。愛國書報社。普智書報社。實國民黨第一支部。社員皆閩人。愛國書報社實國民黨第二支部。社員皆粵人。同黨同居。亦分省界。方言之異。其害大矣。是日自總領事以下僑胞到者不下千人。余演說分四部。一國內狀況。二華僑生活。三華僑教育之利弊。四斐律賓僑學之缺點。又各分子目不下十餘條。歷二小時而後畢。中西教員陳天放君爲傳譯。比茶話散會。已時近黃昏矣。

華僑事業

此間華僑日居自由空氣中。較在英、法、荷、屬及緬甸、暹羅諸國者。精神物質享受幸福高越數等。而頑舊腐敗之程度。不惟不減少。或且加甚焉。除少數留美學生新式商人。其餘或深閉固拒。至死不悟。或用夷變夏。自忘本來。女界尤爲蔽塞。有終身不履街市者。蟄伏高樓小屋。以梳頭裹腳爲修身。以煮飯洗衣爲天職。蓋斐島閩僑最盛。舊俗無論貧富女子。以拋頭露面爲可恥。與粵風男女合作者迥殊。公共團體除商會、教育會、工黨外。有善舉公所。所辦醫院公冢頗有可觀。醫院分中西兩部。發起者前總領事陳謙美君。主持者醫學博士鄭漢淇君。建築設備管理均合科學方式。爲此間華僑事業第一。有東方俱樂部。爲大資本家高等娛樂機關。飲酒賭博爲常事。惟吸煙挾妓尙不敢公然爲之。

總領事館

馬尼拉中國總領事周國賢君。芝加高大學畢業生。通閩粵方言。梁任公之坦腹客。令嬾女士之畫眉人也。伉儷均得晤談。兒女繞膝者數輩。藝衡詞興近亦闌珊矣。奉調星島。不日履新。繼任者爲謝天保君。因刑事嫌疑。僑界公電拒絕。不知其果能走馬到任否。周君告余。去歲一月之官俸。今甫由外交部滙來。蓋欠薪一年以上矣。領館經費恃華僑註冊。每人每年二元。核計應得十餘萬元。然政府對華僑無保護力。故註冊不發生任何效果。須假交際術以招徠之。周君近方遊各島各埠。亦徵集註冊費。爲維持領館計耳。梁夫人不日回國省親。

并爲任公置汽車一乘。此間美貨無入口稅。故車價視津滬爲廉。

華字報館

馬尼拉有華字日報四家。曰公理報。曰民號報。曰南洋商報。曰救國日報。公理傾向保守。民號主張急進。餘二家均中立。言論出版本不取締。但并無嚮導之習與謾罵之風。余迭次演說。各報均派專員闢專欄以記載之。首尾略備。缺誤甚稀。足以覘編輯者之程度矣。報界同人常晤見者有于以同。張伯蔭。來遠甫。陳口口諸君。來陳均外江人。斐律賓大學畢業。于君北人。生於廈門。通方言學。張君粵人。兼愛國學校校長。愛國書報社社長。爲此間國民黨重要分子。其餘各校教職員兼主筆者尙有數人。

斐島政聞

斐律賓人本馬來種。半開民族。全部大小島三千餘。分部落百餘。言語風俗均不同。中國與之交通最早。自泉漳移植者無算。通婚雜居。文化漸進。農工商業均在華人手。十五世紀時。西班牙侵略之。華洋數有衝突。華人無政府後援。不能抗也。西人設政府。傳舊教。亦與土人通婚雜居。屢禁華工而不能絕。前世紀末。有醫學博士 Dr. Jose Rizal 利札者。著書演說。指斥殖民政府。被拘鎗斃。革命軍起。首領阿圭拿度氏 Aguinaldo 建設共和政府。美人陽示聲援。而陰圖占據。革命軍與戰不利。阿氏屈服。獨立取消。美人設政府。傳新教。二十五年

來。物質進步一日千里。美人逆取順守。獎勵自治事業。十年前國會議員瓊司 Gores 氏。提議專條。多數通過。與斐人。以內政全權。但斐人仍要求完全獨立。屢遣請願團。向華盛頓交涉。國內鼓吹尤爲激烈。今總督武德 Gen. Wood 將軍。因細事不憚於斐人。斐閣員全部及兩院議長同時辭職爲抵制。風潮尙未全了。斐政黨亦分兩派。一主即時脫離。一主逐漸準備。前者爲集合黨。後者爲民主黨。輿論贊成前說。而政府援助後說。意見衝突。誇譁繁興。自外人冷眼以觀。決非本島前途之福也。

社會進步

美國統治二十五年之成績。有令人驚歎不置者。不止物質文明之進步而已。政治教育均爲斐人養成自動精神。而提高其人格與程度。今除總督及少數員司外。各機關首長均斐人。執事者更無論矣。教育普及。兒童入學者已逾全數三分之二。交通便利。各島各埠。馳道大開。汽車直達。一切自由平等。與美籍民待遇無殊。斐人亦醉心美風。女權尤極見猛進。全島無乞丐。市民無菜色。都會中雖賤役皆讀書識字。具世界常識。店傭廠工多小學或中學畢業。學校工場之人數以幾何級數增加。平日早晚旅進旅退。各事其事。星期節日則夫婦相攜。少長咸集。公園奏樂。道旁跳舞。人人有以自樂。居然歐洲戰前文明氣象。馬尼拉天然之美。復足以烘託煊染之。雖謂爲東方極樂世界可也。

公共機關

公共機關余得參觀者。有總督府。名 Malacanang Palace。壯麗如王者居。苑囿風景尤勝。有上議院。與美國銀行同一建築。有下議院。與行政各部同一建築。名 The Ayuntamiento。即西班牙政府舊址。三年前擇地新造國會。合兩院於一處。工程未及半。而斐律賓公共銀行因投機事業失敗。行長被逮。建築費無着。中輟至今不成。有市政廳。木屋三層。簡樸無華。有教育局。有勸學所。有科學館。分門別類。事繁人多。而條理井井。有博物館。成立未久。蒐集甚富。而規模太狹。有圖書館。多英文西班牙文。取備實用。并無善本。有動植物園。有水族館。較之歐美具體而微。有龍涅達公園。Imneta Park。爲公共行樂場。愛國烈士利札氏銅像巍然。蓋此其就義處也。有國家醫院。規模闊大。猶過協和。常年經費百餘萬元。收容病人六百餘位。并設醫生看護婦實習班。與斐律賓大學醫科合作共進。有跑馬場。靶子場。與上海者略同。其古建築則有十七世紀舊城。大如我國一縣治。但猶卑淺耳。最可觀者。有模範監獄。登中。瞭望臺。下視監舍。如八陣圖。男女囚六百人。飲食起居如旅館。教授訓練如學校。習藝服役如工場。步伐體操如兵營。星期日買票入觀。軍鼓一鳴。各囚齊出。集於中庭。舉手頓足。皆以音樂勸勒之。不用口號也。聞每日三餐。親往領食。均用此法。獄中除守衛外。一切工作皆用犯人。犯人自立議院。法庭。銀行。商店。即音樂隊亦由犯人組成。惟防禁則極嚴。脫

獄爲不可能之事云。斐律有大學四。皆在馬尼拉城。最古者爲西班牙教士所立聖安瑪大學。San Thomas University。今三百二十七年矣。建築簡樸而堅固。門牆彷彿如營壘。光線空氣不甚佳。教授管理亦舊法。分宗教、文理、醫法、等科。醫學最有名。學生共千四五百人。附設博物館。蒐集視公共博物館尤備。最大者爲斐律賓大學。新式建築三四座。分文理、商法、醫工等科。又有農林、獸醫等科。別在一處。學生共有五千餘人。設備異常周到。機械標本最稱大觀。其解剖室陳屍數百具。男女生操刀而割。尤爲他處所不經見。第一處西班牙人主持。第二處校長雖已用斐人。然仍由美人主持。此外有斐人私立大學二處。一曰國民大學。由私立多校聯合而成。自小學至大學有學生八千餘人。進步極速。各科略備。大學部多數夜學。以便半工半讀之人。其最忙時間爲五時至七時。一曰馬尼拉大學。去年甫成立。規模不如前三校。然合中學亦有學生三千人。除第一校外。皆男女同學。除第二校外。皆徵收學費。并代備宿舍。大抵學費每年百元以上。宿膳費每年三百元以上。斐律賓大學校長帕勒馬氏 *Palma* 國民大學校長鄂希亞氏 *Ostas* 均政黨袖領。帕氏曾任內長。鄂氏曾游中國。對華頗表同情。余觀國民大學馬尼拉大學均無自築校屋。各科距離甚遠。管理不便。設備亦苦未宜。而房租日見增加。學生日形擁擠。其困難情狀何與吾南方大學相似也。

各種公學

余荷斐律賓教育局長馬尼拉勸學所長之招待。得參觀各種各等公立之學校。茲舉其最重要者。一師範學校。男女學生八千餘人。平均年齡十九以上。其女生寄宿舍精美如富豪貴族之邸第。意在養成美術思想。提高生活程度。力矯斐人向來因陋就簡之心理。一模範中學。分三校。學生共計萬人。爲全國學生之中堅教育。一實業學校。半日讀書。半日工作。分木工、鐵工、汽車、電機、圖畫、測量等科。學生近千人。校屋卽由學生自建。一法律學校。附設於國民大學。夜課五年畢業。學生三千餘人。一美術學校。分繪畫、雕刻、塑像三科。一音樂學校。學生各數百人。附設於斐律賓大學。小學僅參觀兩處。曰美昔克 *Masie School* 學生二千餘人。舊式建築。曰安得利 *Andrus School* 學生千五百餘人。新式建築。男女同學。惟手工分班。男習園藝、織草、女習烹飪、裁縫。各校皆注重體操。中學以上并注重兵操。大學更由政府派軍官供槍械。實施徵兵教育。直接受政府之指揮。誰謂有文事者可以不兼修武備哉。美術學校對過有日僑公學。余便道參觀。極蒙校長優待。全體師生起立致敬。并請余用日語演說。共有學生百餘人。男女各半。日文英文亦分別編制。馬尼拉止此一校。成立已五年。華僑教育界竟多不知之。其固蔽誠可驚也。

教會學校

教會學校除聖安瑪大學外。尙有馬尼拉學院 *Athenas Manila* 最有名。初亦西班牙人主

持前三年。美國特派天主教神父接收管理。徹底革新。改用英語。今學生六百餘人。皆中學程度。設博物館。并有軍官教練之兵操。天主教不重視女學。有母教女學者。Institute de Mujeres。天主教一斐婦所創辦。略得教堂津貼費。有小學中學學生五百餘人。宿舍裝修雖不如師範精美。而整潔如之。教堂仍以西班牙時代建築者爲偉大。余參觀兩處。一日聖多明果。San Domingo。一日聖苦魯次。Santa Cruz。雕刻綵繪均極美觀。參拜者終日不絕。星期則黎明時已匍匐滿庭矣。又在龍涅達公園觀天主教聯合祈禱會。大主教爲美人。各教堂均率其童子樂隊來。縞衣絳裳。鮮艷奪目。教會學校男女學生亦同此服色。大主教焚香拜天。升座說法。音樂合奏。人聲歡呼。萬頭攢動。車馬塞途。固由神權迷信未衰。亦見公衆行樂之意耳。

女學開會

斐律賓女學首屈一指者爲中央女學。Centro Escolt de Senonras。余承下議員耶拿君 de la Ilana 介紹往觀。小學、中學、大學、學生共千五百餘人。中學以上皆寄宿。創辦人爲一斐婦。成立二十年矣。西班牙文英文並重。美術音樂等科特長。別設醫科。另爲一院。校長方臥病不獲見。女生自動招待。徧觀各課堂各寢室。是日值日生十人。聞僑會宋萊女士與焉。全校大建築一座。有樓四層。課堂寢室均僅隔斷半截。藉便空氣流通。微嫌聲浪淆亂。寢室

每間百人。床帳被褥潔白一色。無纖翳塵。參觀既畢。諸生堅留小坐。自選數人登臺唱歌跳舞。并臨時演劇。以表歡迎。全校鋼琴五十餘架。同時合奏。復出校中新製各種點心。餉佐以茶乳水果。非惟烹飪爲女生專課。卽斟茶進食。談笑款待。無一非家政學之實習也。流連三小時。始與值日生八人同乘校用汽車。赴醫科參觀。學生百人。五年畢業。程度略如大學。後三日該校戲劇年會。特請余往演說。余極口讚美自動教育之精神。又有一私立女子大學。其人數與成績亦與此伯仲。參觀之日。適值各班演說競爭。請各大學名師爲評判員。其演題有斐律賓獨立愛國英雄之崇拜。女子對社會之貢獻。女學與女權。宗教思想。日本震災救濟策。迷信笑譚。歐美近事等等。與賽者各班共十五人。文字之優美。口齒之清晰。態度之雍容。幾難訂定甲乙。余敢大膽放言。合吾全國各女學。未必能得此十五英文選手也。演說之後。復有短劇。樂歌。跳舞。擊劍。鋼琴合奏。諸技。自晚六時至十二時。余不及聞評判結果如何而先去。蓋已有觀止之歎矣。

鄉村游觀

湘人李彥松君斐律賓大學林科畢業。今爲斐木公司經理。約往參觀其母校。乘汽車行一時半而至羅司班諾。Los Panon 附近有溫泉。在山巖下。男女入浴無禁。車站旁有美國兵營。海陸軍駐防者千餘人。農科林科皆在山高處。成立甫六年。而進步不可以道里計。學生

生活亦與農民爲近。不似都市之奢華。科長請余簡單演說。余勉諸生注重東方文化。且告以非養成獨立之文化。不能形成獨立之國家。斐本亞族黃人。乃始則歐化。繼則美化。而自身本質尙少發揮。是大缺憾。且華斐交通至早。距離至近。斐人且多華裔。而華人多不知斐事。斐人尤多不知華事。此尤可惜也。全堂鼓掌歡呼。表示贊成之意。獸醫科亦在此間。惜天晚未得觀。農科化學試驗室最完備。製糖工廠雖試辦而成效已見。林科採集熱帶奇花異卉多種。聞有他處所未發見。歷史所未記載者。其有功於植物學大矣。當晚仍乘汽車回城。沿途見各鄉村皆有小學。而居民生活至簡。藁草屋爲巢居之。男女均赤足。或露其上身。裙多紅紫色。猶是馬來人本來面目也。

華人血裔

南洋一帶土人統稱馬來種。皮膚襖黑。頭面扁平。鼻準低而鼻孔大。唇厚而闊。翻出如菌。形狀殊醜。但一與華人通婚。則如服換骨仙丹。子孫面目頓爲一變。有時姣好尤勝祖父。暹羅斐律賓上流社會。政治教育界中。十之八九爲華人血裔。但不通國文國語。甚至不能自舉其姓氏。多數謂他人父。味所從來。或見華族式微。雖明知而不肯承認之。且效尤白人。詆譏又加甚焉。暹人斥華人爲奴。斐人更詈華人爲猪。其實明眼人一見即可斷其父系高曾。必出吾族。特若輩生而不養。養而不教。遂使母系偏勝。數典而忘。據美人調查。今斐律賓兩院

議員。華人混種占百分之七十五。西班牙人混種占十五。而純粹斐種不過什一而已。斐島唯一愛國英雄利札博士乃華人之孫。今獨立黨首領下院議長鄂滅亞 Bergio Oshena 及第一富翁慈善家楊格 F. F. Yonger 乃華人之子。皆班班可考。斐豪族多資緣取華人所生女子。上院議長□□氏之夫人。其最著者也。斐島佳人全屬混種。有目共賞。望氣可知。西方人眼光愛西班牙混種。東方人眼光愛華人混種。余所見中央女學、女子大學、及四大學女生。其優秀者。必二分一、四分一、八分一、或十六分一華人。曾志高君兩女公子。宋萊、要華、皆明慧冠其同學。其母系亦出混種。此研究優生學者一極有趣味之材料也。

嘉年華會

嘉年華會者。英語 Carnival 之譯名也。昉於羅馬。盛行於歐美。大都會間。馬尼拉之有此已十有二年矣。通例在二月中。以一星期爲度。龍涅達公園附近有特別區域爲會場。余來適逢其盛。二月十六日開幕。至二十四日止。期內所有公共機關。午后均休假。第一日各部各局及各校整隊游街。奇裝詭飾。音樂跳舞。出奇制勝。如中國迎神賽會故事。軍隊巡警。加崗出勤。游行所經。人山人海。歡笑若狂。會場中政府之設施。各省之出品。學校工廠之成績。海陸空中之軍備。最新科學之發明。分別部居。陳列展覽。入場券價每人二角。此外則百貨商店。游戲娛樂。中西飲食。亦得租地營業。出品天然物多。製造物少。農產則菸、麻、五穀、木料、手

工則染、織、編、物、刺繡、髹漆、爲盛。其怪異者。有中國一長人。一短人。年均三十以來。身材相去五尺以上。斐律賓一孿生兄弟。相背而立。脊椎骨連合爲一。行時一進一退。睡時一偃一仰。今在中學肄業。智慧不異常兒。程度兩人相等。而性情相貌初非盡同。有時爭鬪。四手互搏。不知結婚時將如何。又不知一人先死其後死者將如何。其艷麗者。有俄國哥薩克軍人與前俄皇後宮舞女十六人。鮮衣盛服。馬上跳舞。趾尖著鞍。全身飛聳空際。又有埃及跳舞。夏威夷跳舞。斐島土人跳舞。裸體相摩。表情猥褻。聞當事者已提議禁止。其最熱鬧者。在第三日花后舉行加冕禮。花后者。全城投票公舉最美女子。奉以徽號。寵以桂冠。加冕之日。入場券價每人五元。體制尊嚴。儼然王者。花后以下。更有妃嬪若干人。得票次多者充之。又自擢男子侍從官若干人。口脂面藥。親承薈澤。當朝會時。得吻花后手爲禮。觀禮者數萬人。爭以一見顏色爲榮。花后有自由出入自由宴會之權。其衣服首飾價值數千元。均由會贈與之。今年花后爲斐南蝶女士。Miss Fenandaz。斐律賓婦人會會長。女報主筆。服務社會有聲。芳齡已過花信風數。而姿首風度尙如荳蔻稍頭。聞亦西班牙人混種。歷年被舉者多。賴應酬交際運動得來。與政界黑幕正不相上下也。

鬪雞之戲

鬪蟋蟀、鬪鴿、在中國均親見之。而鬪雞之事。雖歷史有聞。却向未目擊。不謂斐島到處流

行。稱爲國技。惟近賭博。故馬尼拉市中禁止之。余特偕友出城往觀。鬪雞場外。車馬喧闐。男女雜溷。入之則百貨山積。飲食尤便。聞游者不聞晝夜。多寢饋其中也。場上有舞臺。四圍皆樓座。價券自兩角至二元不等。鬪者挾雞登臺。雙方各招其頭。捋其項。屈其毛。逗令發怒。又故故揪抑之。不使輕試其鋒。如此十數分間。兩雞撐拒跳躍。各不可復耐。脫鐐而出。爪嘴並用。目赤如火。毛豎如蝟。上下數合。勝負立見。距後皆縛利刃。敷以毒藥。當者血濡縷而立斃矣。方勝負未決時。萬頭攢動。萬口喧呼。臆下其雌雄。爭爲左右袒。如買馬票然。價無定額。一瞬息間可漲至百數十元。有因此而傾家蕩產者。其流弊誠可畏也。聞各城鎮鄉村無不有鬪雞場。養鷄爲專門學。各師傅授方訣甚秘。并有術語。非個中人不能解。其發達進步如此。

趁輪內渡

余離滬三閱月間。徧歷南洋各屬。游斐旣竟。治任將歸。適天津水產學校校長范蓮青君亦於此時自馬尼拉回國。因相約偕行。二月十八日。上提督公司之哲非遜號。President Jeason 午後五時船開。到步送行者。周總領事。中學周校長。暨各校校長。工黨總理楊寶璋君。僑商會志高君。夫婦及女公子宋萊等。共數十人。是日尙赴嘉年華會一遊。又乘汽車周行全城。并攝影留別。船行一週間。在九龍停二日。余偕范君赴香港游觀。有香港大學學生數人來船訪談。過臺灣海峽。遇大風。浪壁立。全舟震盪不已。余幸不暈眩。而范君則不飲不

食。僵臥一晝夜。同乘者自馬尼拉至香港皆西人。自香港乃多華人。并掣眷屬。男女皆西裝。互操英語談話。令人不勝伊川披髮之感。嗚乎。主權亡則國家不亡而亡。文化滅則人種不滅而滅。吾且不暇爲香港與臺灣之同胞悲矣。

第十編 總評

滿地荆棘

同胞聽之。所謂中華古國皇漢子孫者。歷史之光榮。文明之成績。今已一切蕩然無存。所有者惟痛苦與恥辱耳。人生不幸爲今日民國國民。又大不幸薄具世界常識。徧不安分守己。老死里閭。乃欲航海梯山。觀光上國。彼英法荷美日本。移殖南洋。後來居上。臣妾我犬馬我者。數十年於茲矣。我能低頭下心。奴顏婢膝。則皇恩浩蕩。逮下無私。尙可仰賴生成。苟延視息。若欲伸眉吐氣。妄自比數於人類。則驅逐禁錮。打籐罰錢。相隨而來。不死不止。不去不止。十年以來。我國國際地位日低。東方病夫如突厥勝朝。藩屬如暹羅。皆超軼而上進。我獨瞻望弗及。躑躅泥塗。困頓顛躓。無以自拔。行人視之。不惟不援手。反踐踏蹴躑。以爲笑樂之資。吾人所處。真乃類此。遊歐美大陸者。徒觀其盛麗紛華。同胞居留無多。外人又以好奇心理。優容之。尙不覺待過之冷酷。一往南洋各屬。而吾人之眞地位。乃見。白種士女直視吾族爲野獸。其服西裝操西語者。則目爲半開化之熟蕃。稍假以詞色。俾供其奔走。不然者。掩鼻而

過。望影而趨。避之若浼。烏乎。現象不平如此。有外交和平之可言哉。

入境苛例

南洋羣島本吾同胞數百年來。櫛風沐雨。胼手胝足。辛苦經營之結晶體。今則盜憎主人。束縛馳驟。惟恐不嚴。芟夷蘊崇。惟恐不盡。除需用猪仔外。英法荷美日本各屬華人入境者。無不手續繁難。法令嚴厲。或勒繳重稅。或預儲罰金。或責成舖保多人。或先寄監獄數日。然後訊口供。檢行李。量身裁。印指模。幸則准予登岸。仍附加條件種種。不幸則撥回原埠。領館或幫會代納統船船價。以吾經驗觀之。英法寬猛略同。英惟限制自由。法更藉詞聚斂。荷屬護照易辦。而登岸另一問題。美屬護照難辦。而登岸較有把握。荷屬拒絕智識階級。恐其爲文化之宣傳。英屬拒絕勞動階級。恐其奪土人之生計。目的各殊。手段自異。而其特別苛待。則到處如一轍也。

僑民困苦

殖民地法律上一切賦予之自由。其適用以主人翁爲限。華僑開學校。則置提學使視學官監督之。立報館。則令警察廳或政務司檢查之。集會結社。則除商業或娛樂之機關外。悉設法禁止或封閉之。政府可不宣布理由。不經司法手續。隨時隨意拘捕。搜檢。禁錮。驅逐。華人或不准其登岸。余親見英屬教員數人。夜半被逐。并沒收其行李。某君日記中對政府有微

詞。被人告發。拘禁數日。某君通函內地革命黨人。郵局扣留之。罰鍰仍被逐。幾於偶語有禁。腹誅有誅。舉手投足。皆觸法網。積威之下。使民戰栗。天地雖大。何處是華人安樂鄉耶。

和屬無理

和屬近年來對華人學界。報界。識文字者。着西裝者。一律拒絕。余動身時。即聞蔡子民君未到而被斥。黃任之君。第二次來游。禁止登岸。胡子靜君。因曾辦學。擯不得入。侯寶三君。喬裝而往。見其頭大髮高。斷爲學界中人。拘審半月。仍令出境。謝國光君。以外交部特派員資格。攜有政府公文。并經和公使手書介紹。而竟不接待之。暨南學校。爪哇僑生。亦不得歸省。其家以示回國求學之罰。種種怪事。令人髮指。余之來也。第一。得駐滬和總領事之簽字。第二。經顧少川君。向和公使鄭重先容。第三。經中國駐星島總領事電屬駐爪哇總領事招待。第四。得駐星島和總領事之贊許。而殖民總督竟電沮勿來。余意不甘。特電海牙外交部交涉。因余曾游海牙。識其中央政府要人。故以此舉爲最後之一步。海牙外交部居然以官電訓令殖民總督許余入境。華洋各報轉載。謂爲此破天荒之盛事。不意殖民總督以顏面攸關。老羞成怒。電奏女皇。捏稱余爲第三國際中國共產黨代表。此行專爲運動華僑產業革命。事關全境安危。君命有所不受。云云。余已再函海牙。調查始末。并將詢以證據何在。倘不得滿意答覆。尙當陳訴和國上下兩院。請其向政府提出質問書。結果不可知。奮鬪不容已。吾

大既無有力之政府，有骨之外交官爲後援，橫逆之來，強暴所加，亦惟有人自爲戰而已。

僑民界限

僑民多由閩粵兩省移殖而來。又自劃分爲五屬：閩、廣、潮、瓊、客是也。五屬界限極深，往來絕艱，經商興學，皆欠溝通。其實乃因國語不通行，方言不統一使然，非必地方部落之思想也。粵之潮人好與閩接近，而閩之汀人甘爲粵附庸，客屬則閩粵不分彼此，足徵感情隨言語而變。國語顧不重哉！雖謂國家之不統一，由於國語之不統一，可也。五屬在各埠互有盛衰，迭爭雄長。大抵星加坡檳榔嶼閩粵財富相等，而人數則閩爲特多。吉隆爲惠州人獨占舞臺，盤谷爲潮州人獨占舞臺，他屬人均不敢望其項背。仰光閩粵各半，而富翁則盡屬閩人，或潮人。至於主要職業，各屬亦頗不同。大抵廣州人則照相館中餐館爲盛，妓女最多，瓊人則酒館西餐館爲盛，侍者最多。潮人則米業糖業爲盛，閩人則農業林業爲盛，車夫苦力最多。客人則雜貨店爲盛。所謂外江人者，惟報館主筆、學校教員、暨留學生寥寥可數，無勢力之可言也。

民黨勢力

南洋華僑自來多亡命客，多革命黨。一明末遺民，二太平舊部，三孫派黨徒，四哥老三合各會員，五歷朝罪犯逃亡者之子孫。綜之，其人多數痛恨政府，熱心改革，敢於倡亂，勇於輸將。

故民黨勢力在各部皆最盛。其次尙有康梁君憲一部。與保守派及大資本家攜手。自孫陳分裂。民黨受一大打擊。各埠皆兩派相持。惟陳派究較微弱。自孫黨改組。採用俄制。民黨又受一大打擊。英、法、荷、美政府均公然取締其行事言論。各埠不見國民黨招牌。黨員亦有多數不贊成。而消極脫離者。然而新陳代謝。外江學界青年在報館或學校執事者。多由內地本部特派前來。實負有秘密宣傳運動之使命。故各政府特注意及之。將來或橫被摧殘。或別有發展。當視廣州政局如何而後可斷耳。

僑民惡習

僑民雖無天賦民權之自由。而傷風敗俗。作奸犯科之事。白種所不能爲者。華人乃皆能爲之。此又分二種。一種爲法律所禁之罪案。一種爲法律公許之特權。如鴉片賭博娼妓。在英法屬皆官廳保護。并仰其稅以供政費。械鬪雖墜刑章。亦往往白晝通衢公然殺人。在美屬則以上各種禁令森嚴。而華人尙有大規模之夾帶公司。專運高干嗎啡鴉片於各島。華人私娼馬尼拉一埠已百餘人。賭博尤數見不鮮之事。政府無如何也。當地警吏或染指而抽頭焉。余親見某富商自置輪船兩艘。複壁重輪。專裝鴉片。以此起家。某律師服役稅關。專爲華人包辦妓女上岸。某資本家價購華婦二人。贈與政府某官爲妾婢。別設花烟館以誘惑學界青年。華僑之行徑如此。欲人之重我難哉。

教育缺點

余歷遊各埠，僑立學校均得參觀，茲舉其普通缺點，拉雜述之。一、國語不通行。二、女學不發達。三、體育不注重。四、無職業教育。五、無師範學校。六、各屬分立，經費教授管理均不統一。七、教員資格不彀。少有中學師範畢業者。八、教科書太舊，不合用。九、英語程度大低，不易升學。十、各校聯絡機會太稀。故余之主張：一、各埠不能立教育會者，亦應立學校聯席會，爲統籌全局之機關。二、各校學生合併分配，不問省屬。但問居處遠近及程度高低。三、自國民第一年即完全用國語教授。校中不得用方言。四、多設女學，或開放男學。五、自立師範學校，養成小學教員。其中學與師範教員，則應向內地物色而來。六、多立工商實習學校，并於各校悉添工藝一課。七、教科書應會議審定，頒行一律。八、英語應用外國教員。九、中學畢業應遣回本國升學。十、應參觀外人學校，并多請名人講演。至於馬尼拉教育，病入膏肓，藥資賸眩，須別有伐毛洗髓之計畫，決非僅補苴罅漏可有成也。

南洋奇字

閩粵方言本離奇，重以移殖遠來，更生劇變，多與土語或英法荷語相參。內地初到者，往往不能盡解，并有新製奇字異詁，爲字典辭典所不載者。如日本、朝鮮、安南，雖通用漢字，然各有特別自造之名詞，亦其例也。倘有人蒐輯編纂，必可勒爲巨帙，蔚爲大觀。固治字學語學

者所應有事。茲就憶及者，偶錄數則。如初來者曰新客。土生者曰娃娃。巡警曰綠衣。機器曰火較。轉遞信件曰竹報批郊。租賃汽車曰風車。出稅男曰娼保。女曰娼姥。錢曰枚。冰曰霜。曰雪。鄉村曰山岳。稻田曰土井。省長曰文王。軍官曰武王。總督曰大王。華人曰唐人。外省人曰外江佬。免稅護照曰人情紙。此類不勝枚舉。以上皆爲異語。尙有文字所不能達，則假畸形破體用作記號。是爲奇字。茲不贅記。

統治不同

南洋羣島純爲白種人殖民場。夫政治三大原素曰土地、人民、主權。今南洋政治三者分立。不相關連。土地則馬來也。人民則漢族也。而主權則英、美、荷、法等國也。馬來人無國可亡。其痛苦尙不自覺。亦不易見。緬甸、安南則到處觸目而警心矣。列強對土人統治方法亦不同。美國主開放。荷法主干涉。英則介於兩者之間。荷法專務愚民。幾欲夷滅其種族以爲快。英則施以奴隸教育。養成高等順民。美則以歷史關係假自治爲羈縻懷柔之策。但得保持東方之海軍根據。推行經濟帝國主義。已足滿意。無他野心。以大勢觀之。大英帝國戰後已呈分崩離析之象。幸馬來人太無思想。其反動當後於印度埃及。荷法高壓手段。使至無可忍耐。則困獸猶鬪。蜂蟄有毒。終必有爆發決裂之一日。聞爪哇土酋有名司馬溫（譯音）者。已主張革命。秘密進行矣。將來或如斐律賓人之抵抗西班牙。亦意中事也。美人不徹底之政

策反足以生心而召亂。斐人屢次獨立請願。一似光緒間之公車上書。公民伏闕。瓊斯氏法律。一似宣統末之太廟宣誓十九信條。終無以饜急進者之望。近兩院議員已有公然援美國對英成例。宣告非流血不能獨立者。其機如此。殆不可遏。特美方興盛剛強。與勝朝末葉暮氣已深。鐘漏俱歇者。不可同日語耳。然國家民族之起仆。雖曰天命。亦由人事。是在有志者好自爲之。

交通發達

南洋各屬第一令人感服者。則路政修明交通便利是也。都市場鎮皆通火車。窮鄉僻壤亦無不通汽車。市內皆柏油塗飾。光滑如鏡。并皆有電車。各屬又皆有人力車。惟斐律賓島則專用馬車。鄉間通用牛車。處處可駛腳踏車。余受全國道路協會之委託。便中調查交通事業。匆匆未備詳細報告。然敢斷言。華人移植數百年而無進步。西人移植數十年而大成功。政府所以靈便工商所以發達。防務所以鞏固。皆在道路建設一事。西諺有曰。交通即是文明。即富強亦何莫不由於此。各屬路政主持者。雖爲西人。而工作者多係華人。今大功告竣。華人乃在官裁狗烹之例。詩云。周道如砥。其直如矢。君子所履。小人所視。吾儕小人。并視亦有所不許矣。余見天津。上海。漢口。香港。各租界修路時。白人工師指揮紅頭阿三。鞭撻驅策。黃面苦力。打石塊。拖汽碾。生命直牛馬之不若。路成則大書特書曰。某處某處。犬及華人不